

रोमिमान

१ पौलुस जे यीशु मसीह केर दास हेके, जेके परमेश्वर प्रेरित होवेक केर लाई बोलालक, जेके परमेश्वर केर उ सुसमाचार के प्रचार केर लाई चुनाल गेलाक २ जेकार पहिलेहे नबीमान द्वारा पवित्र शास्त्र में घोषणा कईर देई रहॉए ३ जेकार सम्बन्ध बेटा से आहे, जे शरीर से दाऊद केर वंशज हेके ४ किन्तु पवित्र आतमा केर द्वारा मोरालमान में से जिलाए जाएक केर कारण जेके सामर्थ्य केर साथ परमेश्वर केर बेटा दर्शाए जाहे, येहे यीशु मसीह हमार प्रभु हेके।

५ ईकरे द्वारा मोके अनुग्रह आउर प्रेरिताई मिललक, ताकि सोभे गैर यहूदीमान में, उकार नाम में उ आस्था जे विश्वास से जनम लेवेला, पैदा करेक जाए सकाई। ६ उमान में परमेश्वर केर द्वारा यीशु मसीह केर होवेक केर लाई तोहरे मान भी बोलाल जाहा।

७ मोंग्रं, तोहरे सोउब कर लाई, जेमान रोम में आहा आउर परमेश्वर केर प्यारा हेका, जेमान परमेश्वर केर पवित्र जन होवेक केर लागिन बोलाल जाहा, तोहरेमान लाई ई पत्र लिखाथों।

हमार परम पिता परमेश्वर आउर प्रभु यीशु मसीह केर दिगे से तोहरे के उकार अनुग्रह आउर शांति मिलोक।

धन्यवाद केर प्रार्थना

८ सोउबसे पहिले मोंग्रं यीशु मसीह केर द्वारा तोहरे सोउबझन केर लाई अपन परमेश्वर के धन्यवाद करेक खोजाथों। काहेकि तोहरे केर विश्वास केर चर्चा संसार में सोउब जगह होवाथे। ९ प्रभु जेकार सेवा उकार बेटा केर सुसमाचार केर उपदेश देईके मोंग्रं अपन हृदय से कराथों, प्रभु मोर साक्षी आहे, कि मोंग्रं तोहरे के लगातार याईद करते राहोना। १० अपन प्रार्थना में मोंग्रं सोभे समय ये विनती करते राहोना कि परमेश्वर केर ईच्छा से तोहार टिन आवेक केर मोर यात्रा कोनो रकाम पूरा होक। ११ मोंग्रं बहुत ईच्छा कराथों काहेकि मोंग्रं तोहरे के मिल के कोनो आत्मिक उपहार देवेक खोजाथों, जेकार से तोहरे शक्तिशाली बनेक सकबा। १२ या मोके कहेक लागी कि मोंग्रं जेखान तोहार सगें राहबों, सेखान एक दोसरे केर विश्वास से हमरे परस्पर प्रोत्साहित होबेई।

१३ भाईमान, मोंग्रं चाहाथों, कि तोहरे जाईन पावा कि मोंग्रं तोहार टिन आवेक लाई बार-बार खोजलें ताकि

जैसान फल मोंग्रं गैर यहूदीमान में पाहों, वैसानेहे तोहरे से भी पाए सकबों, किन्तु एखान तक बाधा आते आहे।

१४ मोर ऊपरे यूनानिमान आउर गैर यूनानीमान, बुद्धिमानमान आउर मूर्खमान सोभे कोई केर कर्ज आहे। १५ ईकार लाई मोंग्रं तोहरे रोमवासिमान के भी सुसमाचार केर उपदेश देवेक लाई तैयार आहों।

१६ मोंग्रं सुसमाचार केर लाई शर्मिन्दा नैखों काहेकि उमान में पहिले यहूदीमान आउर फिर गैर यहूदीमान जेमान भी उकार में विश्वास करेना — उमान केर उद्धार केर लाई परमेश्वर केर सामर्थ्य आहे। १७ काहेकि सुसमाचार में ई दर्शाए जाहे, परमेश्वर मनुष्य के अपन प्रति सही कैसान बनाएला। ई आदि से अंत तक विश्वास में टिकाल आहे जैसान कि शास्त्र में लिखाल आहे, “धर्मी मनुष्य विश्वास से जीवित रहबाँए।”

सोउब कोई पाप कईराँए

१८ उ आदमीमान के जेमान सच के अधर्म से लुकाएना, बुरा काम आउर हर बुराई में सोगर से परमेश्वर केर खिस प्रकट होई। १९ आउर ऐसान होवाथे काहेकि परमेश्वर केर बारे में उमान भाल से जानेना काहेकि परमेश्वर ई सोउब के उमान के बताहे।

२० जेखान से संसार केर रचना होहे उकार अदृश्य विशेषतामान अनन्त शक्ति आउर परमेश्वरत्व साफ साफ देखाए देते आहे काहेकि उ वस्तुमान से सोउब के भाल से जानेक पाराएला, जे परमेश्वर रईचे। ईकार लाई आदमीमान टिन कोनो बहाना नैखे।

२१ यद्यपि उमान परमेश्वर के जानेना किन्तु उमान उके परमेश्वर केर रूप में सम्मान या धन्यवाद नी देवेना। लेकिन उमान अपन बिचार में निरर्थक होए गेलाएँ। आउर उमान केर मन जड़ केर अन्धार से भईर गेलाक। २२ उमान बुद्धिमान होवेक केर दावा कईरके मूर्ख ही रई गेलाएँ। २३ आउर अविनाशी परमेश्वर केर महिमा के नाशवान मनुष्यमान, चाराईमान, पशु आउर साँपमान से मिलेक जुलेक मूर्तिमान में उमान ढाईल देलाँए।

२४ ईकार लाई परमेश्वर उमान केर मन के बुरा ईच्छामान केर हाथ में सौईप देलाक। उमान दुराचार में पईड के एक दोसरे केर शरीरमान केर अनादर करेक

लगलाई। २५ उमान झूठ के साथ परमेश्वर के सच के सौदा करलाई आउ उमान सृष्टि के बनाएक वाला के छोईड़ के उमान के बनाल सृष्टि करालमान के उपासना सेवा करेक लगलाई। परमेश्वर धन्य आहे। आमीन।

२६ ईकरे लाई परमेश्वर उमान के तुच्छ वासना के हाथ में सौईप देलाक। उमान के स्त्रीमान भी स्वाभाविक यौन सम्बन्धमान के बजाय अस्वाभाविक यौन सम्बन्ध करेक लगलाई। २७ ओहे रकाम पुरुषमान भी स्त्रीमान के सागें स्वाभाविक संभोग छोईड़ देलाई आउ उमान आपस में हे वासना में जलेक लगलाई। आउ पुरुषमान परस्पर एक दोसरे के सागें बुरा काम करेक लगलाई। उमान के अपन भ्रष्टाचार के यथोचित फल भी मिलेक लगलक।

२८ आउ काहेकि उमान परमेश्वर के चिन्हेक से मना कईर देलाई सेहेसे परमेश्वर उमान के कुबुद्धि के हाथ में सौईप देलाक। आउ ईमान ऐसान अनुचित काम करेक लगलाई जेमान के नी करेक लगिसिले। २९ उमान हर रकाम के अधर्म, पाप, लालच आउ वैर से भईर गेलाई। उमान डाह, हत्या, लड़ाई-झगड़ा, छल-छद्म आउ दुर्भावना से भराल आहाँ। उमान दोसरामान के सोभे समय अहित सोचेना। उमान नाना रकाम के कुचिन्ता बनाते रहेना। ३० उमान में निन्दक आहाँ, आउ परमेश्वर के घृणा करेना। उमान उदृष्ट आहाँ, अहंकारी आहाँ, बड़बोला आहाँ, बुराई के जनमदाता हेकाँ, आउ माता-पिता के आज्ञा नी मानेना। ३१ उमान मुख, वचन-भंग करेक वाला, प्रेम-रहित आउ निर्दयी हेकाँ। ३२ चाहे उमान परमेश्वर के धर्मपूर्ण विधि के जानेना जे बताएला कि जेमान ऐसान बात करेना, उमान मौत के योग्य हेकाँ, फिर भी उमान न केवल उ काममान के करेना, लेकिन वैसान करेक वालामान के समर्थन भी करेना।

तोहेरमान भी पापी हेका

२ सेहेसे, न्याय करेक वाला मोर संगी तो जे भी हेकिस, तोर कोनो बहाना नैखे काहेकि जे बात केर लाई तोयं केहे दोसरे के दोषी मानिसिला, उकरे से तोयं अपन के भी अपराधी सिद्ध करिसिला काहेकि तोयं जे काम केर न्याय करिसिला उ काममान के तोयं भी करिसिला। १ एखान हमरे ईके जानिला कि जे आदमीमान ऐसान काम करेना उमान के परमेश्वर के उचित दण्ड मिलेला। २ किन्तु हे मोर संगी का तोयं सोचाथिस कि तोयं जे काममान केर लाई दोसरामान के अपराधी

ठहलाईसिला आउ निजे होले वैसानेहे काम करिसिला होले का तोयं सोचाथिस कि तोयं परमेश्वर के न्याय से बईच जाबों कईके। ३ या तोयं उकार महान अनुग्रह, सहनशक्ति आउ धैर्य के हीन समझिसिला? आउ ई बात केर उपेक्षा करिसिला कि उकार करुणा तोके प्रायश्चित केर दिगे लेई जाथे कईके।

४ किन्तु अपन कठोरता आउ केखनो भी पछतावा नी करेक वाला मन के कारण उकार क्रोध के अपन लाई उ दिन केर लाई ईकड़ा कराथिस जेखान परमेश्वर केर सच्चा न्याय प्रकट होई। ५ परमेश्वर सोभे कोई के आपन आपन काम के अनुसार फल देई। ६ जे लगातार अच्छा काम करते करते महिमा, आदर आउ अमरता केर खोज में आहे, उके उ बदली में अनन्त जीवन देई। ७ किन्तु जे अपन स्वार्थीपन से सच्चाई में नी चईल के अधर्म में चलेला उके बदली में खिस आउ प्रकोप मिली। ८ उ सोभे आदमीमान में दुःख आउ संकट आवी जेमान बुराई में चलेना। पहिले यहूदीमान में आउ फिर गैर यहूदीमान में। ९ आउ जे केहे अच्छाई में चलेला उके महिमा, आदर आउ शांति मिली। पहिले यहूदीमान के आउ फिर गैर यहूदीमान के १० काहेकि परमेश्वर केकरो पक्षपात नी करेला।

११ जेमान व्यवस्था के बिना पाए के पाप कईाँ, उमान व्यवस्था से बाहिरे रई के नष्ट होबाएँ। आउ जेमान व्यवस्था में रई केहे पाप कईाँ उमान के व्यवस्था केर अनुसार दण्ड मिली। १२ काहेकि उमान जेसोउब केवल व्यवस्था केर कथा सुनेना परमेश्वर केर दृष्टि में धर्मी न लगाएँ। लेकिन जेमान व्यवस्था में चलेना उमान हे धर्मी ठहराल जाबाएँ।

१३ सेहेसे जेकान गैर यहूदी मान जेमान ठिन व्यवस्था नैखे स्वभाव से हे व्यवस्था केर बातमान में चलेना होले चाहे उमान ठिन व्यवस्था नैखे होले भी उमान अपन व्यवस्था निजे हेकाएँ। १४ उमान अपन मन में लिखाल, व्यवस्था केर काममान के दिखाएना। उमान केर विवेक भी ईसोउब के हे साक्षी देवेला आउ उमान केर मानसिक संघर्षे उमान के अपराधी या निर्दोष कहेला।

१५ बातमान उ दिन होई जेखान परमेश्वर मनुष्य केर छूपाल बातमान के, जेमान के माँय उपदेश देओना उ सुसमाचार केर अनुसार यीशु मसीह केर द्वारा न्याय करी।

यहूदी आउर व्यवस्था

१६ किन्तु यदि तोयं अपन के यहूदी कहाथिस आउ व्यवस्था में तोर विश्वास आहे आउ अपन परमेश्वर

में तोर अभिमान आहे १८आउर तोयं उकार ईच्छा के जानिसिला आउर उत्तम बातमान के ग्रहण करिसिला, काहेकि व्यवस्था से तोके सिखाल जाहे, १९तोयं ईके मानिसिला कि तोयं अंधरामान केर अगुआ हेकिस, जेमान अंधार में भटाईक जाथाएँ उमान केर लाई तोयं इंजोत हेकिस, २०अबोध आदमीमान के सिखाएक वाला हेकिस, छौवामान केर उपदेशक हेकिस काहेकि व्यवस्था में तोके साक्षात् ज्ञान आउर सच्चाई ठोस रूप में प्राप्त होहे, २१होले तोयं जे आउरमान के सिखाईसिला, अपन के काहे नी सिखाईसिला। तोयं जे चोर नी करेक केर उपदेश देईसिला, होले स्वयं चोरी काहे करिसिला? २२तोयं जे कहिसिला व्यभिचार नी करेक लगी कईके, आउर स्वयं व्यभिचार काहे करिसिला? तोयं जे मूर्तिमान के घृणा करिसिला मन्दिरमान केर धन काहे छीन लेई सिला? २३तोयं जे व्यवस्था केर अभिमानी हेकिस, व्यवस्था के तोईड के परमेश्वर केर निरादर काहे करिसिला? २४“तोरे कारण हे गैर यहूदीमान में परमेश्वर केर नाम केर अपमान होवेला?” जैसान कि शास्त्र में लिखाल आहे।

२५यदि तोयं व्यवस्था केर पालन करिसिला तौभी खतना केर महत्व आहे होले भी यदि तोयं व्यवस्था के तोडिसिला होले तोर खतना रहित होवेक केर समान बनले। २६यदि केकरो खतना नी होहे आउर उ व्यवस्था केर पवित्र नियममान में चलेला होले का उके खतना रहित होवेक के भी खतना नी गिनाल जाई जाणों? २७उ आदमी जेकार शरीर से खतना नी होहे आउर जे व्यवस्था के पालन करेला, तोके अपराधी ठहराई। जेकार ठिन लिखित व्यवस्था केर विधान आहे, आउर जेकार खतना भी होहे, आउर जे व्यवस्था के तोड़ेला,

२८जे बाहिर से यहूदी हेके, उझन आसल में यहूदी न लगे। शरीर केर खतना आसल में खतना न लगे। २९सच्चा यहूदी ओहे हेके जे भीतरे से यहूदी हेके। सच्चा खतना आतमा द्वारा मन केर खतना हेके, न कि लिखित व्यवस्था केर। ऐसान आदमी केर प्रशंसा मनुष्य नई लेकिन परमेश्वर केर ओर से कराल जाएला।

३ १सेहेसे यहूदी होवेक केर का लाभ या खतना केर का मूल्य? १हर प्रकार से बहुत कुछ। काहेकि सोउबसे पहिले परमेश्वर केर उपदेश तो उमान केहे सौपाल जाहे। २यदि उमान में से केहो विश्वासघाती होए भी जाहाएँ होले भी का? का उमान केर विश्वासघातीपन परमेश्वर केर विश्वासपूर्णता के बेकार कईरे देई? ३निश्चय नई, यदि सोभे कोई झूठा भी आहाएँ होले भी परमेश्वर सच्चा ठहरी। जैसान कि शास्त्र में लिखाल आहे:

“ताकि जेखान तोयं कहबे तोयं उचित सिद्ध हो आउर जेखान तोर न्याय होई, तोर विजय होई।”

भजन संहिता ५१:४

५सेहेसे यदि हमार अधार्मिकता परमेश्वर केर धार्मिकता सिद्ध करी होले हमरे का कहबई? का ई कि उ अपन कोप हमरे में प्रकट कईरे के अन्याय नी कराथे? (मोयं एकझन मनुष्य केर रूप में अपन बात कहथों।) ६निश्चय नई, नि होले उ जगत केर न्याय कैसान करी।

७किन्तु तोहरे कहेक सकाला: “जेखान मोर मिथ्यापूर्णता से परमेश्वर केर सत्यपूर्णता आउर अधिक उजागर होवेला होले ईकार से उकार महिमाए होवेला, फिर भी मोयं दोषी करार काहे देवाल जाथों?” ८आउर फिर काहे नी कहबई: “आवा! बुरा काम करबोई ताकि भलाई प्रकट होक।” जैसान कि हमार बारे में निन्दा कईरेके जे आदमीमान हमार ऊपरे आरोप लगाएना कि हमरे ऐसान कहिला कईके। ऐसान आदमीमान के दोषी करार देवेक केर योग्य हेकाएँ। उमान सोभे दोषी हेकाएँ।

केहो भी धर्मी नैखाएँ

९तो फिर हमरे का कहबई? का हमरे यहूदी गैर यहूदीमान से तनिक भी अच्छा आही, नई बिल्कुल नई। काहेकि हमरे ईके दशाए चुईकी कि चाहे यहूदी होंक, चाहे गैर यहूदी सोभे पाप केर वश में आहाएँ। १०शास्त्र कहेला:

“केहो भी धर्मी नैखाएँ, एकझन भी नई!

११ केहो समझदार नैखाएँ, एकझन भी नई!

केहो ऐसान नैखाएँ, जे प्रभु के खोजेना!

१२ सोउब भटईक गेलाएँ,

उमान सोउब निकम्मा बईन गेलाएँ,

सागें-सागें सोउब के सोउब, केहो भी हियाँ दया होले नी देखाएना, एकझन भी नई!”

भजन संहिता १४:१-३

१३ “उमान केर मुँख खुला कबर रकाम बईन जाहे, उमान अपन जीभ से टगाई करेना।”

भजन संहिता ५:९

“उमान केर होठ में नाग विष रहेला।”

भजन संहिता १४०:३

१४ “शाप केर कटुता से मुँख भराल रहेला।”

भजन संहिता १०:७

१५ “हत्या करेक केर लाई उमान हरदम हड़वड़ाए
चलेना।

१६ उमान जहाँ कहीं भी जाएना नाश ही करेना, संताप
देवाएना।

१७ उमान के शांति केर रास्ता केर पता नैखे।”

यशायाह ५९:७-८

१८ “उमान केर आँईख में प्रभु केर प्रति डर नैखे।”

भजन संहिता ३६:१

१९एखान हमरे ईके जानिला कि व्यवस्था में जे कुछ कहाल जाहे, उ उमान के सम्बोधित करेला जेमान व्यवस्था केर अधीन आहाएँ। ताकि हर मुँख के बन्द कराल जाए सकी आउर सारा जगत परमेश्वर केर दण्ड केर योग्य ठहरी। २०व्यवस्था केर काममान से कोनो भी आदमी परमेश्वर केर सामने धर्मी सिद्ध नी होएक सकेना। काहेकि व्यवस्था से जे कुछ मिलेला, उ हेके पाप केर पहचान कराएक होवेला।

परमेश्वर मनुष्यमान के धर्मी कैसान बनाएला

२१किन्तु आसल में मनुष्य केर लाई ई दर्शाल जाहे कि परमेश्वर व्यवस्था केर बिना उके अपन प्रति सही कैसान बनाएला। निश्चय ही व्यवस्था आउर नबिमान ईकार साक्षी देहाँए। २२सोभे विश्वासिमान केर लाई यीशु मसीह में विश्वास केर द्वारा परमेश्वर केर धार्मिकता प्रकट कराल जाहे बिना कोनो भेदभाव से। २३काहेकि सोभे कोई पाप कईरँए आउर सोभे परमेश्वर केर महिमा से रहित आहाँए। २४किन्तु यीशु मसीह में सम्पन्न कराए जावाल अनुग्रह केर छुटकारा केर द्वारा उकार अनुग्रह से उसोउब एक सेंटमेत केर उपहार केर रूप में धर्मी ठहराय जाहाँए। २५परमेश्वर यीशु मसीह के, उमान में विश्वास केर द्वारा पापमान से छुटकारा दिलाएक केर लाई, आदमीमान के देलाक। उ ई काम यीशु मसीह केर बलिदान केर रूप में करलक। ऐसान ईके प्रमाणित करेक केर लाई कराल गेलाक कि परमेश्वर सहनशील आहे काहेकि उ पहिले उमान के उमान केर पापमान केर दण्ड बिना देईके छोईड देई राहे। २६आईज भी अपन न्याय दर्शाएक केर लाई उ न्यायपूर्ण आहे आउर न्यायकर्ता भी हेके, उमान केर जेमान यीशु मसीह में विश्वास कारएना।

२७होले फिर घमण्ड करेक कहाँ रहलक? उ तो समाप्त होए गेलाक। कैसान से? का उ विधि से जेकार में व्यवस्था जे कानमान के अपेक्षा करेला, उसोउब के कराल जाएला जानों? नई, लेकिन उ विधि से जेकार में विश्वास समाए जाहे। २८कोनो आदमी व्यवस्था केर काममान केर अनुसार चईल के नई लेकिन विश्वास केर द्वारा ही धर्मी बईन सकेना। २९या परमेश्वर का बस यहूदीमान केर हेके? का उ गैर यहूदीमान केर न लगे? हाँ उ गैर यहूदीमान केर भी हेके। ३०काहेकि परमेश्वर एकझन आहे। ओहे उमान केर जेमान केर विश्वास केर आधार में खतना होहे, आउर उमान केर जेमान केर खतना नी होहे ओहे विश्वास केर द्वारा, धर्मी ठहराई। ३१तो का, हमरे विश्वास केर आधार में व्यवस्था के व्यर्थ ठहराथी? निश्चय नई। लेकिन हमरे तो व्यवस्था के आउर अधिक शक्तिशाली बनाथी।

ईब्राहीम केर उदाहरण

४ होले फिर हमरे का कहबोई कि हमार शारीरिक पिता ईब्राहीम के ईकार में का मिललक? १काहेकि यदि ईब्राहीम के उकार काममान केर कारण धर्मी ठहराल जाथे होले उकार गर्व करेक केर बात राहे। किन्तु परमेश्वर केर सामने उ आसल में गर्व नी करेक परतक। २पवित्र शास्त्र का कहेला? “ईब्राहीम परमेश्वर में विश्वास करलक आउर उ विश्वास उकार लाई धार्मिकता गिनल गेलाक।”^a

३काम करेक वाला के मजदूरी देवेक कोनो दान न लगे, उ तो उकार अधिकार हेके। ४किन्तु यदि कोनो आदमी काम करेक केर बजाय उ परमेश्वर में विश्वास करेला, जे पाप के भी छोईड देवेला, होले उकार विश्वास से उकार धार्मिकता केर कारण बईन जाएला। ५ऐसानेहे दाऊद भी उके धन्य मानेला जे काममान केर आधार केर बिना परमेश्वर धर्मी मानेला। उ जेखान कहेला:

७ “धन्य हेकाएँ उमान जेमान के व्यवस्था रहित काममान केर क्षमा मिललक आउर जेमान केर पापमान के ढाँईप देवाल गेलाक।

८ धन्य हेके उ पुरुष जेकार पापमान के परमेश्वर नी गिनलक!” भजन संहिता ३२:१-२

९होले का ई धन्यपन केवल ओहेमान केर लाई हेके जेमान केर खतना होहे, या उमान केर लाई भी जेमान

^a ४:३ उद्धरण उत्पत्ति १५:६

केर खतना नी होहे। (हाँ, ईंटु उमान में भी लागू होवेला जेमान केर खतना नी होहे) काहेकि मोयं कहलौ ईब्राहीम केर विश्वासे उकार लाई धार्मिकता गिनाल गेलाक।^{१०} होले ईंटु केखान गिनाल गेलाक? जेखान उकार खतना होए चुईक राहे या जेखान उ बिना खतना केर राहे। नई खतना होवेक केर पिछे नई लेकिन खतना होवेक केर स्थिति से पहिले।^{११} आउर फिर एकटु चिन्हां केर रूप में उ खतना ग्रहण करलक। जे उ विश्वास केर परिणामस्वरूप धार्मिकता केर एकटु छाप राहे जेके उ उ समय दर्शाय राहे जेखान उकार खतना नी होए राहे। ईकार लाई उ उसोउबमान केरो पिता हेके जेमान यद्यपि बिना खतना केर हेकाएँ किन्तु विश्वासी आहाँ। (ईकार लाई उमान भी धर्मी गिनाल जाबाँए)^{१२} आउर उ उमान केर भी पिता हेके जेमान केर खतना होहे किन्तु जेमान हमार पूर्वज ईब्राहीम केर विश्वास के जेतुके उ खतना होवेक से पहिले प्रकट कईर राहे, अनुसरण कराएना।

विश्वास आउर परमेश्वर केर वचन

^{१३}ईब्राहीम या उकार वंश के ई प्रतिज्ञा वचन राहे कि उमान संसार केर उत्तराधिकारी होबाँए, ई प्रतिज्ञा व्यवस्था से नी मिल राहे लेकिन उ धार्मिकता से मिल राहे जे विश्वास केर द्वारा उत्पन्न होवेला।^{१४} यदि जेमान व्यवस्था के मानेना, उमान जगत केर उत्तराधिकारी हेकाँए होले विश्वास केर कोनो अर्थ नी राही आउर वचन भी बेकार होए जाई।^{१५} आदमीमान केर द्वारा व्यवस्था केर पालन नी करेक से परमेश्वर केर क्रोध उपजेला किन्तु जहाँ व्यवस्थाए नैखे हुवाँ व्यवस्था केर उल्लंघनौ नैखे?

^{१६}ईकार लाई सिद्ध हेके कि परमेश्वर केर वचन विश्वास केर फल हेके आउर ईंटु सेंटमेत में से मिलेला। ई रकाम उकार वचन ईब्राहीम केर सोभे वंश केर लाई सुनिश्चित आहे, न केवल उमान केर लाई जेमान व्यवस्था के मानेना लेकिन उमान सोउब कर लाई भी जेमान ईब्राहीम केर समान विश्वास करेना। उ हमार सोउब कर पिता हेके।^{१७} शास्त्र बताएला, “मोयं तोके (ईब्राहीम) अनेक देशमान केर पिता बनलौ।”^{१८} उ परमेश्वर केर दृष्टि में उ ईब्राहीम हमार पिता हेके जेकार ऊपरे उकार विश्वास आहे। परमेश्वर जे मोराल मान केहो जीवन देवेला आउर जेमान नैखाँए, उमान के अस्तित्व देवेला।

^{१९}सोउब मानवीय आशा केर विरुद्ध अपन मन में आशा कईर के ईब्राहीम उकार में विश्वास करलक, ईकार लाई उके कहाल अनुसार अनेक देशमान केर

पिता बनलक। “तोर अनगिनत वंश होबाँए।”^{२०} अपन विश्वास में बिना डगमगाए के आउर ईके जाईन के भी कि उकार शारीर सौ साल केर बूडा नरियान होए चुईके आउर सारा बाँझ राहे फिर भी,^{२१} परमेश्वर केर वचन में विश्वास रखलक। ईतनाए नई, विश्वास के आउर मज़बूत कईके परमेश्वर केर महिमा देलाक।^{२२} उके पूरा भरोसा राहे कि परमेश्वर उके जे वचन देहे, उके पूरा करेक में उ पूरा समर्थ आहे।^{२३} ईकार लाई, “ई विश्वास उकार लाई धार्मिकता गिनाल गेलाक।”^{२४} शास्त्र केर ई वचन हेके कि विश्वास उकार लाई धार्मिकता गिनाल गेलाक, न केवल उकार लाई हेके,^{२५} लेकिन हमार लाई भी हेके। परमेश्वर हमरे के, जेमान उकार में विश्वास करेना, धार्मिकता स्वीकार करी। उ हमार प्रभु यीशु के फिर से जीवित करलक।^{२६} यीशु जेके हमार पापमान केर लागिन मोराएक लाई सौपाल गेलाक आउर हमरे के धर्मी बनाएक केर लागिन मोरालमान में से पूनः जीवित कराल गेलाक।

परमेश्वर केर प्रेम

^{२७} काहेकि हमरे अपन विश्वास केर कारण परमेश्वर केर लाई धर्मी होए जाहि, सेहेसे अपन प्रभु यीशु मसीह केर द्वारा हमार परमेश्वर से मेल होए जाहे।^{२८} उकरे द्वारा विश्वास केर कारण उकार जे अनुग्रह में हमार स्थिति आहे, हुवाँ तक हमार पहुँच होए जाहे। आउर हमरे परमेश्वर केर महिमा केर कोनो भाग पावेक केर आशा केर आनन्द लेविला।^{२९} ईतनाए नई, हमरे अपन विपत्तिमान में भी आनन्द लेविला। काहेकि हमरे जानिला कि विपत्ति धीरज केर जनम देवेला।^{३०} आउर धीरज से परखाल चरित्र निकलेला। परखाल चरित्र आशा केर जनम देवेला।^{३१} आउर आशा हमरे के निराशा नी होवेक देला काहेकि पवित्र आतमा केर द्वारा, जे हमरे के देवाल जाहे, परमेश्वर केर प्रेम हमार हृदय में उँडाईल देवाल जाहे।

^{३२} काहेकि हमरे जेखान निर्बल राही होले उचित समय में हमार भक्तिहीनमान केर लागिन मसीह अपन बलिदान देलाक।^{३३} थोड़ाए आदमीमान कोनो मनुष्य केर लाई अपन प्राण त्यागेक लाई तैय्यार होएना, चाहे उ भक्त मनुष्य होले भी।^{३४} लेकिन परमेश्वर हमरे में अपन प्रेम देखालक। जेखान कि हमरे तो पापीये राही, किन्तु यीशु हमार लागिन प्राण त्याग देलाक।

^{३५} काहेकि एखान जब हमरे उकार लहू केर कारण धर्मी होए जाही होले एखान उकार द्वारा परमेश्वर केर

b ४:१८ उद्धरण उत्पत्ति १५:५

c ४:२२ उद्धरण उत्पत्ति १५:६

क्रोध से अवश्य बचाल जाबोई। १०काहेकि जेखान हमरे उकार बैरी रही उ अपन मृत्यु केर द्वारा परमेश्वर से हमार मेलमिलाप करुवालक होले एखान जब कि हमार मेलमिलाप होए चुईके उकार जीवन से हमार आउर कितना अधिक रक्षा होई। ११ईतनाए नई कि हमरे अपन प्रभु यीशु केर द्वारा परमेश्वर केर भक्ति पाएके एखान उकार में आनन्द लेवीला।

आदम आउर यीशु

१२ईकार लाई एकइन आदमी (आदम) केर द्वारा जैसान धरती में पाप आलाक आउर पाप से मृत्यु आउर ई रकाम मृत्यु सोउब आदमीमान केर लाई आलक काहेकि सोभे कोई पाप कइर रहॉए। १३एखान देखा व्यवस्था केर आवेक से पहिले जगत में पाप राहे किन्तु जेखान तक कोनो व्यवस्था नी होताक होले केकरो भी पाप नी गिनाल जाताक। १४किन्तु आदम से लेईके मूसा केर समय तक मृत्यु सोउबकर में राज करते रहलक। मृत्यु उमान में भी वैसानेहे हावी रहे जेमान पाप नी कइर रहॉए जैसान कि आदम में।

आदम भी वैसानेहे राहे जैसान उ जे (मसीह) आवेक वाला राहे। १५किन्तु परमेश्वर केर वरदान आदम केर अपराध केर जैसान नी राहे काहेकि यदि उ एकइन आदमी केर अपराध केर कारण सोभे आदमीमान केर मृत्यु होलाक होले उ एकइन आदमी यीशु मसीह केर करुणा केर कारण मिलाल परमेश्वर केर अनुग्रह आउर वरदान तो सोभे आदमीमान केर भलाई केर लाई कितना आउर अधिक आहे। १६आउर ई वरदान भी उ पापी केर द्वारा आनाल परिणाम केर समान नैखे काहेकि दण्ड केर हेतु न्याय केर आगमन एकइन केर अपराध केर पिछे होए राहे। किन्तु ई वरदान, जे दोष-मुक्ति केर ओर लेई जाएला, अनेक अपराधमान केर पिछे आए राहे। १७अतः यदि एकइन आदमी के उ अपराध केर कारण मृत्यु केर शासन होए गेलाक। होले जे परमेश्वर केर अनुग्रह आउर उकार वरदान केर प्रचुरता केर — जेकार में धर्मी केर निवास आहे — उपभोग कराथे — उ तो जीवन में उ एकइन आदमी यीशु मसीह केर द्वारा आउर भी अधिक शासन करी।

१८सेहेसे जैसान एकइन केर अपराध केर कारण सोभे आदमीमान के दोषी ठहराल गेलाक, वैसानेहे एकदु धर्म केर काम केर द्वारा सोउबइन केर लाई परिणाम में अनन्त जीवन प्रदान करेक वाला धार्मिकता मिललक। १९अतः जैसान उ एकइन आदमी केर आज्ञा नी मानेक केर कारण सोउब आदमीमान के पापी बनाए देवाल गेलाक वैसानेहे

उ आदमी केर आज्ञाकारिता केर कारण सोभे आदमीमान के धर्मी भी बनाए देवाल जाई। २०व्यवस्था केर आगमन ईकार लाई होलाक कि अपराध बईद जाओक। किन्तु जहाँ पाप बदलक, हुवाँ परमेश्वर केर अनुग्रह आउर भी अधिक बदलक। २१ताकि जैसान मृत्यु केर द्वारा पाप राज्य करलक ठीक वैसानेहे हमार प्रभु यीशु मसीह केर द्वारा अनन्त जीवन केर आनेक केर लाई परमेश्वर केर अनुग्रह धार्मिकता केर द्वारा राज्य करलक।

पाप केर लाई मृत्यु किन्तु मसीह में जीवन

६ होले हमरे का कहबोई? का हमरे पाप करते राहबोई ताकि परमेश्वर केर अनुग्रह बढ़ते रहोक? १निश्चय नई। हमरे जे पाप केर लाई मोईर चुईकि पाप में कैसान जिबोई? २था का तोहरे नी जानाथा कि हमरे, जेमान यीशु मसीह में बपतिस्मा लेही, उकार मृत्यु केर बपतिस्मा लेही। ३सेहेसे उकार मृत्यु में बपतिस्मा लेवेक से हमरे भी उकार सागें तोपाए देवाल जाए राही ताकि जैसान परमपिता केर महिमामय शक्ति केर द्वारा यीशु मसीह के मोरालमान में से जिलाए देवाल जाए राहे, वैसानेहे हमरे भी एक नौतून जीवन पाबोई।

४काहेकि जेखान हमरे उकार मृत्यु में उकार सागें रही होले उकार जैसान पुनरुत्थान में भी उकार सागें रहबोई। ५हमरे ईके जानिला कि हमार पुराना आदमीत्व यीशु केर सागें क्रूस में चढ़ाए देवाल जाए राहे ताकि पाप से भराल हमार शरीर नष्ट होए जाओक। आउर हमरे आगे केर लाई पाप केर दास बईन नी रहबोई। ६काहेकि जे मोईर गेलाक उ पाप केर बन्धन से छुटकारा पाए गेलाक।

७आउर काहेकि हमरे मसीह केर सागें मोईर गेली, सेहे हमार विश्वास आहे कि हमरे उकरे सागें जिबोई भी। ८हमरे जानिला कि मसीह जेके मोराल मान में से जीवित कराल जाए राहे अमर आहे। उकार ऊपरे मौत केर वश कभी नी चली। ९जे मृत्यु से उ मोरलक, उ सोउब समय केर पाप केर लाई मोरलक किन्तु जे जीवन उ जीयाते, उ जीवन परमेश्वर केर लाई हेके। १०येहे रकाम तोहरे अपन लाई भी सोचा कि तोहरे पाप केर लाई मोईर चुईखा किन्तु यीशु मसीह में परमेश्वर केर लाई जीवित आहा।

११ईकार से तोहरे केर नाशवान् शरीर केर ऊपरे पाप केर वश नी चली। ताकि तोहरे पाप केर ईच्छामान में कभी नई चलबा। १२अपन शरीर केर अंगमान के अधर्म केर सेवा केर लाई पाप केर हवाले न करा लेकिन मोरालमान में से जी उठेक वालामान केर समान परमेश्वर केर अधीन कइर देवा। आउर अपन शरीर केर अंगमान के धार्मिकता

केर सेवा केर साधन केर रूप में परमेश्वर केर अधीन कईर देवा। १*तोहरे में पाप केर शासन नी होई काहेकि तोहरे व्यवस्था केर सहारा नी जीयाला लेकिन परमेश्वर केर अनुग्रह केर सहारे जीयाला।

धार्मिकता केर सेवक

१*होले हमरे का करबोई? का हमरे पाप करबोई? काहेकि हमरे व्यवस्था केर अधीन नैखी, लेकिन परमेश्वर केर अनुग्रह केर अधीन जीयाथी। निश्चय नई। १*का तोहरे नी जानाला कि जेखान तोहरे केकरो आज्ञा मानेक केर लाई अपन के दास केर रूप में उके सौपाला होले तोहरे दास हेका। फिर चाहे तोहरे पाप केर दास बना, जे तोहरे के मोराए देई आउर चाहे आज्ञाकारिता केर, जे तोहरे के धार्मिकता केर दिगे लेई जाई। १*किन्तु प्रभु केर धन्यवाद होक कि यद्यपि तोहरे पाप केर दास राहा, तोहरे अपन मन से उ उपदेशमान केर रीति के मानला जेसोउब के तोहरे के सौपाल जाए राहे। १*तोहरे के पापमान से छुटकारा मिल गेलाक आउर तोहरे धार्मिकता केर सेवक बईन जाहा। १*(मोंग्र एकठु उदाहरण देवार्थों जेके सोभे मान समईझ सका काहेकि उके समझाएक तोहरे मान केर लाई कठिन आहे।) काहेकि तोहरे अपन शरीर केर अंगमान के अपवित्रता आउर व्यवस्था हीनता केर आगे उकार दास केर रूप में सौईप देई रहा जेकार से व्यवस्था हीनता पैदा होलाक, एखान तोहरे मान ठीक वैसानेहे अपने शरीर केर अंगमान के दास केर रूप में धार्मिकता केर हाथ में सौईप देवा ताकि सम्पूर्ण समर्पण उत्पन्न होक।

१*काहेकि तोहरे जेखान पाप केर दास रहा होले धार्मिकता केर ओर से तोहरे उपरे कोनो बन्धन नी राहे। १*आउर देखा उ समय तोहरे के कैसान फल मिललक? जेकार लाई आईज तोहरे शर्मिन्दा आहा, जेकार अंतिम परिणाम मृत्यु हेके। १*किन्तु एखान तोहरे के पाप से छुटकारा मिल चुईके आउर परमेश्वर केर दास बनाए देवाल गेला होले जे खेती तोहरे काटाथा, तोहरे के परमेश्वर केर प्रति सम्पूर्ण समर्पण में लेई जाई। जेकार अंतिम परिणाम हेके अनन्त जीवन। १*काहेकि पाप केर मूल्य तो बस मृत्यु हेके जबकि हमार प्रभु यीशु मसीह में अनन्त जीवन, परमेश्वर केर संतमेत केर वरदान आहे।

शादी केर दृष्टान्त

७ १*हे भाईमान, का तोहरे नी जानाला (मोंग्र उमान के कथाथों जेमान व्यवस्था के जानेना) कि व्यवस्था केर शासन कोनो आदमी में सेखान तक आहे

जेखान तक उ जीते राहेल? १*उदाहरण केर लाई एकझन विवाहिता स्त्री अपन पति केर सागें विधान केर अनुसार सेखान तक बँधाल राहेल जेखान तक उ जीवित राहेल किन्तु यदि उकार पति मोईर जाएला, होले उ विवाह सम्बन्धी नियममान से छूईट जाएला। १*पति केर जीते जी यदि कोनो दोसरे पुरुष से सम्बन्ध जोड़ी होले उके व्यभिचारिणी कहाल जाएला किन्तु यदि उकार पुरुष मोईर जाएला होले विवाह सम्बन्धी नियम उ ऊपरे नी लगेला आउर ईकार लाई यदि उ दोसरा पुरुष केर होए जाएला होले भी उ व्यभिचारिणी न लगे।

१*हे मोर भाईमान, ऐसानहे मसीह केर देह केर द्वारा व्यवस्था केर लाई तोहरे भी मोईर चुईका। ईकार लाई एखान तोहरे भी कोनो दोसरे से नाता जोईड सकाला। उकार से जे मोरालमान में से पुनर्जीवित कराल जाहे। ताकि हमरे परमेश्वर केर लाई काममान केर उत्तम खेती करेक सकबोई। १*काहेकि जेखान हमरे मानव स्वभाव केर अनुसार जीयात राही, हमार पापपूर्ण वासनामान जे व्यवस्था केर द्वारा आय राहे, हमार अंगमान में हावी राहे। ताकि हमार काममान केर ऐसान खेती करबोई जेकार अंत मृत्यु में होवेला। १*किन्तु एखान हमरे व्यवस्था से छुटकारा देई देवाल जाही काहेकि जे व्यवस्था केर अधीन हमरे बंदी बनाए जाए राही, हमरे उकार लाई मोईर चुकलि। आउर एखान पुराना लिखित व्यवस्था से नई, लेकिन आतमा केर नौतून रीति से प्रेरित होएके हमरे अपन स्वामी परमेश्वर केर सेवा करिवा।

पाप से लड़ाई

१*होले हमरे का कहबोई? का हमरे कहबोई कि व्यवस्था पाप हेके? निश्चय नई। जे भी होक, यदि व्यवस्था नी होताक होले मोंग्र चिन्ह नी पातों कि पाप का हेके? यदि व्यवस्था नी बतातक, “जे अनुचित हेके उकार चाहत न करा” होले निश्चय मोंग्र चिन्हए नी पातों कि अनुचित ईच्छा का हेके। १*किन्तु पाप के मौका मिलते व्यवस्था केर लाभ उठाएके मोर में हर तरह केर ऐसान ईच्छामान भईर देलाक जे अनुचित केर लाई राहे। व्यवस्था केर अभाव में पाप तो मोईर गेलाक। १*एक समय मोंग्र बिना व्यवस्था केर जीवित राहों, किन्तु जेखान व्यवस्था केर आदेश आलाक होले पाप जीवन में उभईर आलाक। १*आउर मोंग्र मोईर गेलों। ओहे व्यवस्था केर आदेश जे जीवन देवेक केर लाई राहे, मोर लाई मृत्यु लेई आनलक। १*काहेकि पाप के अवसर मिल गेलाक आउर उ ओहे व्यवस्था

केर आदेश केर द्वारा मोके छललक आउर उकरे द्वारा मोके मोरालक।

११ई रकाम व्यवस्था पवित्र आहे आउर उ विधान पवित्र, धर्मी आउर उत्तम आहे। १२होले का ईकार ई अर्थ हेके कि जे उत्तम आहे, ओहे मोर मृत्यु केर कारण बनलक? निश्चय नई। लेकिन पाप उ उत्तम केर द्वारा मोर लाई मृत्यु केर ईकार लाई कारण बनलक कि पाप के चिन्हेक सकाओक। आउर व्यवस्था केर विधान केर द्वारा उकार भयानक पापपूर्णाता देखाए जाए सकाओक।

मानसिक द्रन्द्र

१३काहेकि हमरे जानिला कि व्यवस्था तो आत्मिक हेके आउर मोंयं हाड-मांस केर भौतिक मनुष्य हेकों जे पाप केर दासता केर लाई बेचाए जाहों। १४मोंयं नी जानोना मोंयं का करारथों काहेकि मोंयं जे करेक चाहोना, नी करोना, लेकिन मोके उके करेक होएला, जेके मोंयं घृणा करोना। १५आउर यदि मोंयं उखे करारथों जेके मोंयं नी करेक खोजोना होले मोंयं स्वीकार करतों कि व्यवस्था उत्तम आहे कईके। १६किन्तु आसल में उ मोंयं न लगों जे ई सोउब कुछ करारथे, लेकिन ई मोर भीतरे बसाल पाप हेके। १७हाँ, मोंयं जानोना कि मोर में यानी मोर भौतिक मानव शरीर में कोनो अच्छा वस्तु केर वास नैखे। अच्छा करेक केर ईच्छा तो मोर में आहे लेकिन नेक काम मोर से नी होवेला। १८काहेकि जे अच्छा काम मोंयं करेक खोजोना, मोंयं नी करोना लेकिन जेके मोंयं नी करेक खोजोना, ओहे बुरा काम मोंयं करोना। १९आउर यदि मोंयं ओहे काम करोना जेमान के करेक नी खोजोना होले आसल में उकार कर्ता जे उसोउब के करारथे, मोंयं न लगों, लेकिन उ पाप हेके जे मोर में बईसे।

२०ईकार लाई मोंयं अपन में येहे नियम पाओना कि मोंयं जेखान अच्छा करेक खोजोना, होले अपन में बुराई केहे पाओना। २१अपन अन्तरात्मा में मोंयं परमेश्वर केर व्यवस्था के सहर्ष मानोना। २२लेकिन अपन शरीर में मोंयं एक दूसरा नियम केर काम करेक देखोना ई मोर चिन्तन में शासन करेक वाला व्यवस्था से युद्ध करेला आउर मोके पाप केर व्यवस्था केर बंदी बनाए लेवेला। ई व्यवस्था मोर शरीर में क्रियाशील आहे। २३मोंयं एकइन्न अभागा इंसान हेकों। मोके ई शरीर से, जे मृत्यु केर निवाला हेके, छुटकारा के दिलाई? २४अपन प्रभु यीशु मसीह केर द्वारा मोंयं परमेश्वर के धन्यवाद करारथों। अपन हाड मांस केर शरीर से मोंयं पाप केर व्यवस्था केर गुलाम होए के भी अपन बुद्धि से परमेश्वर केर व्यवस्था केर सेवक हेकों।

आतमा से जीवन

२५ई रकाम एखान उकार लाई जेमान यीशु मसीह में स्थित आहाँए, कोनो दण्ड नैखे। [काहेकि उमान शरीर केर अनुसार नई लेकिन आतमा केर अनुसार चलेना।] २६काहेकि आतमा केर व्यवस्था जे यीशु मसीह में जीवन देवेला, तोके पाप केर व्यवस्था से जे मृत्यु केर ओर लेई जाएला, स्वतन्त्र कईरे देईहे। २७जेकार से मूसा केर उ व्यवस्था जे मनुष्य केर भौतिक स्वभाव केर कारण दुर्बल बनाए देवाल जाए राहे, नी करेक सकलक उके परमेश्वर अपन बेटा के हमार जैसान शरीर में भेईजके जेकार से हमरे पाप करिला — उकार भौतिक देह के पाप वाली बनाएके पाप के निरस्त कईके पूरा करलक। २८जेकार से कि हमार द्वारा, जे देह केर भौतिक विधि से नई, लेकिन आतमा केर विधि से जीएना, व्यवस्था केर आवश्यकतामान के पूरा करेक जाए सकी।

२९काहेकि उ जेमान अपन भौतिक मानव स्वभाव केर अनुसार जीएना, उमान केर बुद्धि मानव स्वभाव केर ईच्छामान में टिकाल राहेला लेकिन उ जेमान आतमा केर अनुसार जीएना, उमान केर बुद्धि जे आतमा खोजेना उसोउब अभिलाषामान में लगाल राहेला। ३०भौतिक मानव स्वभाव केर बस में राहेक वाला मन केर अन्त मृत्यु हेके, किन्तु आतमा केर वश में राहेक वाला बुद्धि केर परिणाम हेके जीवन आउर शान्ति। ३१ई रकाम भौतिक मानव स्वभाव से अनुशासित मन परमेश्वर केर विरोधी हेके। काहेकि उ न तो परमेश्वर केर नियममान केर अधीन आहे आउर नी होवेक सकेला। ३२आउर उ जेमान भौतिक मानव स्वभाव केर अनुसार जीएना, परमेश्वर के प्रसन्न नी करेक सकेना।

३३किन्तु तोहरे मान भौतिक मानव स्वभाव केर अधीन नैखा, लेकिन आतमा केर अधीन आहा यदि आसल में तोहार में परमेश्वर केर आतमा केर निवास आहे। किन्तु यदि केकरों में यीशु मसीह केर आतमा नैखे होले उ मसीह केर न लगे। ३४दोसरा दिगे यदि तोहार में मसीह आहे होले चाहे तोहार देह पाप केर हेतु मोईर चुईके पवित्र आतमा, परमेश्वर केर सागों तोहरे के धार्मिक ठहराएके स्वयं तोहरे लाई जीवन बईन जाई। ३५आउर यदि उ आतमा जेके यीशु के मोरालमान में से जिलाए राहे, तोहरे केर भीतरे वास कईरे, होले उ परमेश्वर जेहार यीशु के मोरालमान में से जिलाए राहे, तोहरे केर भी नाशवान शरीर के अपन आतमा से जे तोहरे केर भीतरे बईसे, जीवन देई।

३६ईकार लाई मोर भाईमान, हमरे में ई भौतिक शरीर
 v ८:२ तुझे कोनो कोनो यूनानी प्रति में आहे "मोके।"

केर कर्ज तो आहे किन्तु ऐसान नई कि हमरे ईकार अनुसार जिबोई।^{१३} काहेकि यदि तोहरे भौतिक शरीर केर अनुसार जिबा होले मोरबा। किन्तु यदि तोहरे आतमा केर द्वारा शरीर केर व्यवहारमान केर अंत कईर देबा होले तोहरे जी जाबा।

^{१४} जेमान परमेश्वर केर आतमा केर अनुसार चलेना, उमान परमेश्वर केर संतान हेकाँए।^{१५} काहेकि उ आतमा जे तोहरे के मिले, तोहरे के फिर से दास बनाएक या डरुवाएक केर लाई न लगे, लेकिन उ आतमा जेके तोहरे पाहा तोहरे के परमेश्वर केर संपालित संतान बनाएला। जेकार से हमरे कहिला, “हे अब्बा, हे पिता!”^{१६} उ पवित्र आतमा स्वयं हमार आतमा केर सागें मिलके साक्षी देवेला कि हमरे परमेश्वर केर संतान हेकि सेके।^{१७} आउर काहेकि हमरे उकार संतान हेकि, हमरे भी उत्तराधिकारी हेकि, परमेश्वर केर उत्तराधिकारी आउर मसीह केर सागें हमरे उत्तराधिकारी यदि आसल में उकार सागें दुःख उठाबोई होले हमरे के उकार सागें महिमा मिलबे घारी।

हमरे के महिमा मिली

^{१८} काहेकि मोर विचार में ई समय केर हमार यातनामान प्रकट होवेक वाला भावी महिमा केर आगे कोनो भी न लगे।^{१९} काहेकि ई सृष्टि बड़ी आशा से उ समय केर इंतजार कराथे आहे जेखान परमेश्वर केर संतान के प्रकट कराल जाई।^{२०} ई सृष्टि निःसार राहे अपन ईच्छा से नई, लेकिन उकार ईच्छा से जेहार ईके ई आशा केर अधीन करलक।^{२१} कि ई भी केखनों अपन विनाशमानता से छुटकारा पाएके परमेश्वर केर संतान केर शानदार स्वतन्त्रता केर आनन्द लेई।

^{२२} काहेकि हमरे जानिला कि आईज तक समूचा सृष्टि पीड़ा में कराहते आउर तड़पते आहे।^{२३} न केवल ई सृष्टि लेकिन हमरे भी जेमान के आतमा केर पहिला फल मिलहे, अपन भीतरे कराहते आही। काहेकि हमरे उकार द्वारा पूरा अपनाय जाएक केर इंतजार आहे कि हमार देह मुक्ति होए जाई।^{२४} हमार उद्धार होहे। ईकरे से हमार मन में आशारा आहे किन्तु जेखान हमरे जेकार आशारा करिला, उके देखेख लेती होले उ आशारा नी राहतक। जे दिसाथे उकार आशारा के कईर सकेला।^{२५} किन्तु यदि जेके हमरे देखेख नी पाथी उकार आशारा करिला होले धीरज आउर सहनशीलता केर सागें उकार बाट जोहिला।

^{२६} ऐसानेहे जैसान हमरे कराहती, आतमा हमार दुर्बलता में हमार सहायता करेक आवेला काहेकि हमरे

नी जानिला कि हमरे केकार लाई प्रार्थना करबोई। किन्तु आतमा स्वयं ऐसानेहे आह! भईर के जेकार शब्द में अभिआदमी नी कराल जाए सकेला, हमार लाई विनती करेला।^{२७} किन्तु उ अन्तर्यामी जानेला कि आतमा केर मनसा का हेके। काहेकि परमेश्वर केर ईच्छा सेहे उ परमेश्वर केर पवित्र जनमान केर लाई मध्यस्थता करेला।

^{२८} आउर हमरे जानिला कि हर परिस्थिति में उ आतमा परमेश्वर केर भक्तमान केर सागें मिल के उ काम करेला जे भलाई आनेला उ सोउब कर लाई जेके उकार प्रयोजन केर अनुसार बोलाल जाहे।^{२९} जेमान के उ पहिले से चुईने उमान के पहिलेहे अपन बेटा केर रूप में ठहरालक ताकि बहुत से भाईमान में उमान सोउबसे बड़ा भाई बईन सकबाँए।^{३०} जेमान के उ पहिले से निश्चित करलक, उमान के भी उ बोलालक आउर जेमान के उ बोलालक, उमान के उ धर्मी ठहरालक आउर जेमान के उ धर्मी ठहरालक, उमान के महिमा भी प्रदान करलक।

परमेश्वर केर प्रेम

^{३१} होले ईके देखेके हमरे का कहबोई? यदि परमेश्वर हमार पक्ष में आहे होले हमार विरोध में के होए सकेला?^{३२} उ जे अपन बेटा तक के बचाए के नी रखलक लेकिन उके हमार सोउब कर लाई मोरेक केर लाई सौँप देलाक। उ भला हमरे के उकार सागें आउर सोउब कुछ काहे नी देई? ^{३३} परमेश्वर केर चुनाल आदमीमान में ऐसान के आहे जे दोष लगाई? उ परमेश्वरे हेके जे उमान के निर्दोष ठहराएला।^{३४} ऐसान के आहे जे उमान के दोषी ठहराई? मसीह यीशु उ हेके जे मोईर गेलाक (आउर ईकार से भी अधिक महत्त्वपूर्ण ईदु हेके कि) उके फिर जिलाल गेलाक। जे परमेश्वर केर दाहिना ओर बैठे आउर हमार ओर से विनती भी करेला ^{३५} के आहे जे हमरे के मसीह केर प्यार से अलग करी? यातना या कठिनाई या अत्याचार या अकाल या नंगापन या जोखिम या तलवार? ^{३६} जैसान कि शास्त्र कहेला:

“तोर (मसीह) लाई सारा दिन हमरे मृत्यु के सौँपाल जाएला।

हमरे काटेक वाला भेड़ जैसान समझाल

जाएला।”

भजन संहिता ४४:२२

^{३७} फिर भी उकार द्वारा जे हमरे के प्रेम करेला, ई सोउब बातमान में हमरे एकदु शानदार विजय पावाथी।^{३८} काहेकि मोंयं माईन चुईकों कि न मृत्यु आउर न जीवन,

न सोरगदूत आउर न शासन करेक वाला आतमामान, न वर्तमान केर कोनो वस्तु आउर न भविष्य केर कोनो वस्तु, न आत्मिक शक्तिमान, ^{३५}न कोनो हमार ऊपरे केर आउर न हमार नीचे केर, न सृष्टि केर कोनो आउर वस्तु हमरे के प्रभु केर उ प्रेम से, जे हमार भीतरे प्रभु यीशु मसीह केर प्रति आहे, हमरे के अलग कईर सकी।

परमेश्वर आउर यहूदीमान

१ मसीह में मोंयं सच कहाथों। मोंयं झूठ नी कहाथों आउर मोर चेतना जे पवित्र आतमा केर द्वारा प्रकाशित आहे, मोर सागों मोर साक्षी देवेला, ^२मोके गहरा दुःख आहे आउर मोर मन में निरन्तर पीड़ा आहे। ^३काश मोंयं करेक सकतों कि अपन भाई बहिनमान आउर दुनियावी सम्बन्धिमान केर लाई मोंयं मसीह केर शाप अपन ऊपरे लेई लेतों आउर उमान से अलग होए जातों। ^४जेमान ईसाएली हेकाँए आउर जेमान के परमेश्वर केर संपालित संतान होवेक केर अधिकार आहे, जेमान परमेश्वर केर महिमा के दर्शन कईर चुईकाँए, जेमान परमेश्वर केर प्रतिज्ञा केर भागीदार हेकाँए। जेमान के मूसा केर व्यवस्था, सच्चा उपासना आउर वचन प्रदान कराल जाहे। ^५पुरखामान ओहेमान से सम्बन्ध रखेना आउर मानव शरीर केर दृष्टि से मसीह ओहेमान में पैदा होलाक जे सोउब कर परमेश्वर हेके आउर सदा धन्य आहे! आमीन।

^६ऐसान नैखे कि परमेश्वर अपन वचन पूरा नी कईर काहेकि जेमान ईसाएल केर वंश हेकाँए, उमान सोभे ईसाएली न लगाएँ। ^७आउर न ही ईब्राहीम केर वंश होवेक केर कारण उमान सोउब सचमुच ईब्राहीम केरे संतान हेकाँए। लेकिन जैसान परमेश्वर कहलक, “तोर वंश ईसहाक केर द्वारा अपन परम्परा बढ़ाबाँए।”^८ ^९अर्थात ई नई कि प्राकृतिक तौर में शरीर से पैदा होवेक वाला छौवा परमेश्वर केर वंश हेके, लेकिन परमेश्वर केर वचन से प्रेरित होवेक वाला उकार वंश मानाल जाएना। ^{१०}वचन ई रकाम कहाल जाए राहे: “निश्चित समय में मोंयं घुरबों आउर सारा केर बेटा होई।”^{११}^b

^{१२}ईतनाए नई जेखान रिबका भी एकझन आदमी, हमार पूर्व पिता ईसहाक से गर्भवती होलाक ^{१३}होले बेटामान केर पैदा होवेक से पहिले आउर उमान केर कोनो भी भला बुरा करेक से पहिले कहाल जाए राहे जेकार से परमेश्वर केर उ प्रयोजन सिद्ध होक जे चुनाव से सिद्ध

होवेला। ^{१४}आउर जे आदमी केर काम में नी टिकलक लेकिन उ परमेश्वर में टिखे जे बोलाएक वाला आहे। रिबका से कहाल गेलाक, “बड़ा बेटा छोटा बेटा केर सेवा करी।”^{१५} ^{१६}शास्त्र कहेला: “मोंयं याकूब के चुनलों आउर ईसाऊ के नकाईर देलों।”^d

^{१७}होले हमरे का कहबोई? का परमेश्वर अन्यायी हेके? ^{१८}निश्चय नई! काहेकि उ मूसा के कई राहे, “मोंयं जेकार में भी दया करेक केर लाई सोचबों, दया देखाबों। आउर जेकार में भी अनुग्रह करेक खोजबों, अनुग्रह करबों।”^e

^{१९}ईकार लाई न तो ई केकरों ईच्छा में निर्भर करेला आउर न केकरो कुदेक में लेकिन दयालु परमेश्वर में निर्भर करेला। ^{२०}काहेकि शास्त्र में परमेश्वर फिरौन के कई राहे, “मोंयं तोके ईकार लाई खड़ा कईर राहों कि मोंयं अपन शक्ति तोर में देखाएक सकबों। आउर मोर नाम समूचा धरती में घोषित कराल जाओक।”^f ^{२१}सेहेसे परमेश्वर जेकार ऊपरे खोजेला उके दया करेला आउर जेके चाहेला कठोर बनाए देवेला।

^{२२}होले फिर तोयं शायद मोके कहबे, “यदि हमार काममान केर नियन्त्रण करेक वाला परमेश्वर हेके होले फिर भी उ उकार में हमार दोष काहे समझेला?”^{२३} आखिरकार उकार ईच्छा केर विरोध के कईर सकेला? ^{२४}मनुष्य तोयं के हेकिस जे परमेश्वर के उलटाए के उत्तर देबे? का कोनो रचना अपन रचेक वाला से पूछेक सकेला कि, “तोयं मोके ऐसान काहे बनाले?” ^{२५}का कोनो कुम्हार केर माटी में ई अधिकार नैखे कि उ कोनो एकटु लौदा से एकटु बरतनमान केर विशेष प्रयोजन केर लै आउर दोसरा के हीन प्रयोजन केर लाई बनाएक लाई?

^{२६}किन्तु ईकार में का आहे यदि परमेश्वर अपन क्रोध देखाएक आउर अपन शक्ति जताएक केर लाई उ आदमीमान के, जेमान क्रोध केर पात्र रहँए आउर जेमान केर विनाश होवेक राहे, बड़ी धीरज केर सागों सहलक, ^{२७}उमान केर लाई सहलक ताकि उ उ आदमीमान केर लाभ केर लाई जे दया केर पात्र रहँए आउर जेमान के उ अपन महिमा पावेक केर लाई बनाय राहे, उमान में अपन महिमा प्रकट करेक सकी। ^{२८}अर्थात हमार जेमान के उ न केवल यहूदीमान में से बोलालक लेकिन गैर यहूदीमान में से भी ^{२९}जैसान कि होशे केर पुस्तक में लिखाल आहे:

^c १:१२ उद्धरण उत्पत्ति २५:२३

^d १:१३ उद्धरण मलाकी १:२-३

^e १:१५ उद्धरण निर्गमन ३३:१९

^f १:१७ उद्धरण निर्गमन १:१६

^a १:७ उद्धरण उत्पत्ति २१:१२

^b १:९ उद्धरण उत्पत्ति १८:१०, १४

“जे आदमीमान मोर नी रहाँए
उमान के मोंयं अपन कहबों।
आउर उ स्त्री जे प्रिय नी राहे
मोंयं उके प्रिया कहबों।”

होशे २:२३

किन्तु उ जे उकार में विश्वास करेला,
उके कभी निराश नी होवेक होई।”

यशायाह ८:१४; २८:१६

२६आउर,

“वैसानेहं घटी जैसान ओहे भाग में उमान के कहल
जाए राहे,
‘तोहरे मान मोर प्रजा न लगा।’
हुवाँए उमान जीवित परमेश्वर केर सन्तान
कहलाबाँए।”

होशे १:१०

२७आउर यशायाह ईसाएल केर बारे में पुकारै केर कहेला:

“यद्यपि ईसाएल केर सन्तान समुद्र केर बालू केर
कर्णों केर समान असंख्य आहाँए।
होले भी उमान में से केवल थोड़ा सा बचेक
पाबाँए।

२८ काहेकि प्रभु पृथ्वी में अपन न्याय के पूरा से आउर
जल्दीए पूरा करी।” यशायाह १०:२२-२३

२९आउर जैसान कि यशायाह भविष्यवाणी कईर राहे:

“यदि सर्वशक्तिमान प्रभु हमार लाई,
वंश नी छोड़ताक
होले हमरे सदोम जैसान
आउर अरोमा जैसाने होए जाती।” यशायाह १:९

३०होले हमरे का कहबोई? हमरे ई नतीजा में पहुँईची
कि अन्य जातिमान केर आदमीमान जेमान धार्मिकता
केर खोज में नी रहाँए, उमान धार्मिकता के पाए गेलाँए।
उमान जेमान विश्वास केर कारण धार्मिक ठहराए गेलाँए।
३१किन्तु ईसाएल केर आदमीमान जेमान ऐसान व्यवस्था में
चलेक चाहात रहाँए जेसोउब उमान के धार्मिक ठहरातक,
उकार अनुसार जीएक नी सकलाँए। ३२काहे नी सकलाँए?
काहेकि उमान ईकार पालन विश्वास से नई, लेकिन अपन
काम से करात रहाँए, उमान उ चट्टान में ठोकर खालाँए, जे
ठोकर देवेला। ३३जैसान कि शास्त्र कहेला:

“देखा, मोंयं सिय्योन में एकटु पत्थर रखाथों, जेठु
ठोकर देवेला
आउर एकटु चट्टान जेठु अपराध करुवाएला।

१० हे भाईमान, मोर हृदय केर ईच्छा आहे आउर
मोंयं परमेश्वर के उ सोउब कर लाई प्रार्थना
कराथों कि उमान केर उद्धार होक। काहेकि मोंयं साक्षी
देवाथों कि उमान में परमेश्वर केर शुरु आहे। किन्तु उ
ज्ञान में टिकाल नैखे, काहेकि उमान उ धार्मिकता के
नी जानात रहाँए जे परमेश्वर से मिलेला आउर उमान
अपन धार्मिकता केर स्थापना करेक जतन करात रहाँए सेहे
उमान परमेश्वर केर धार्मिकता के स्वीकार नी करलाँए।
४मसीह व्यवस्था केर अंत करलक ताकि हर कोई जे
विश्वास करेना, परमेश्वर केर लाई धार्मिक होक।

५धार्मिकता केर बारे में जे व्यवस्था से प्राप्त होवेला, मूसा
लिखे, “जे व्यवस्था केर नियममान में चली, उ उसोउब
केर कारण जीवित रही।”^a किन्तु विश्वास से मिलेक
वाला धार्मिकता केर विषय में शास्त्र ईके कहेला: “तोयं
अपन से ईके न पूछ, ‘सोरग में ऊपरे के जाई?’” (यानी,
“मसीह के नीचे धरती में आनेक।”) ६“या, ‘नीचे पाताल
में के जाई?’” (यानी, “मसीह के धरती केर नीचे से ऊपरे
आनेक। यानी मसीह के मोरालमान में से घुराए आनेके।”)

७शास्त्र ईके कहेला: “वचन तोर टिन आहे, तोर होठ
में आहे आउर तोर मन में आहे।”^b यानी विश्वास केर उ
वचन जेकार हमरे प्रचार करिला। ८कि यदि तोयं अपन
मुँख से कहबे, “यीशु मसीह प्रभु हेके,” आउर तोयं अपन
मन में ई विश्वास करबे कि परमेश्वर उके मोरालमान में से
जीवित करलक होले तोर उद्धार होए जाई। ९काहेकि
अपन हृदय केर विश्वास से आदमी धार्मिक ठहराय
जाएला आउर अपन मुँख से उकार विश्वास के स्वीकार
करेक से उकार उद्धार होवेला।

१०शास्त्र कहेला: “जेहार उकार में विश्वास करेला उके
निराश नी होएक पड़ी।”^c ११ईठु ईकार लाई हेके कि
यहूदीमान आउर गैर यहूदीमान में कोनो भेद नैखे काहेकि
सोउब कर प्रभु तो एकेझन हेके। आउर उकार दया उ
सोउब केर लाई, जेमान उकार नाम लेवेना, अपरम्पार
आहाँए। १२“हर कोई जे प्रभु केर नाम लेवेना, उद्धार
पाबाँए।”^d

a १०:५ उद्धारण लैव्य १८:५

b १०:६-८ उद्धारण व्यवस्था ३०:१४

c १०:११ उद्धारण यशा. २८:१६

d १०:१३ उद्धारण योएल २:३२

१४किन्तु उमान जेमान कि उकार में विश्वास नी करना, उकार नाम कैसान पुकारबाँए? आउर उमान जेमान कि उकार बारे में सुनबे नी कईराँए, उकार में विश्वास कैसान करेक पारबाँए? आउर फिर जेखान तक केहो उमान के उपदेश देवेक वाला नी होबाँए, उमान कैसान सुईन पाबाँए? १५आउर उपदेशकझन के जेखान तक भेजाल नी जाए सेखान तक उपदेश कैसान देवेक पारी? जैसान कि शास्त्रमान में कहाल जाहे: “सुसमाचार लानेक वाला केर चरण कितना सुन्दर आहे।”^a

१६किन्तु सोउब कोई सुसमाचार के स्वीकार नी कईराँए। यशायाह कहेला, “हे प्रभु, हमार उपदेश के केहार स्वीकार करलक?”^b १७सेहेसे उपदेश के सुनेक से विश्वास उपजेला आउर उपदेश सेखान सुनाल जाएला जेखान केहो मसीह केर विषय में उपदेश देवेना।

१८किन्तु मोंयं कहाथों, “का उमान हमार उपदेश के नी सुनलाँए?” हाँ, निश्चय। शास्त्र कहेला:

“उकार स्वर समूचा धरती में फैईल गेलाक,
आउर उकार वचन जगत केर एक छोर
से दोसरा छोर तक पहुँचलक।”

भजन संहिता ११:४

१९किन्तु मोंयं पूछाथों, “का ईसाएली नी समझात रहाँए?” मूसा कहेला:

“पहिले मोंयं तोहरे मान केर मन में ऐसान
आदमीमान केर द्वारा जेमान आसल में
कोनो जाति केर न लगाएँ, डाह पैदा करबों।
मोंयं विश्वासहीन जाति केर द्वारा तोहरे के क्रोध
दिलवाबों।” व्यवस्था विवरण ३२:२१

२०फिर यशायाह साहस से कहेला:

“मोके उ आदमीमान पाए गेलाएँ
जेमान मोके नी खोजात रहाँए।
मोंयं उमान केर लाई प्रकट होए गेलों जेमान मोर
खोज खबर में नी रहाँए।” यशायाह ६५:१

२१किन्तु परमेश्वर ईसाएलिमान केर बारे में कईहे,

“मोंयं सारा दिन आजा नी मानेक वाला
आउर अपन विरोधिमान केर आगे हाथ फैलाए
राहलों।” यशायाह ६५:२

परमेश्वर अपन आदमीमान के नी भूलाहे

११ होले मोंयं पूछाथों, “का परमेश्वर अपने आदमीमान के नकाईर नी देलाक?” निश्चय नई। काहेकि मोंयं भी एकझन ईसाएली हेकों, ईब्राहीम केर वंश से आउर बिन्यामीन केर गोत्र से हेकों। २परमेश्वर अपन आदमीमान के नी नकाईरे जेमान के उ पहिले से हे चुईन राहे। अथवा का तोहरे नी जानाला कि एलिय्याह केर बारे में शास्त्र का कहेला: कि जेखान एलिय्याह परमेश्वर के ईसाएल केर आदमीमान केर विरोध में प्रार्थना करात राहे? ३“हे प्रभु, उमान तोर नबीमान के मोराए देलाएँ। तोर वेदिमान के टुटाए के गिराए देलाएँ। केवल एकझन नबी मोंयं बईचों आउर उमान मोके भी मोराए देवेक केर जतन कराथाँए।”^c ४किन्तु सेखान परमेश्वर उके कैसान उत्तर देई राहे, “मोंयं अपन लाई सात हजार आदमीमान के बचाए रईखों जेमान बाल केर आगे माथा नी टेईकाँए।”^d

५सेहेसे वैसानेहे आईज कईल भी थोड़ा ऐसान आदमीमान बईचाँए जेमान उकार अनुग्रह केर कारण चुनाल जाहाँए। ६आउर यदि ईतु परमेश्वर केर अनुग्रह केर परिणाम हेके होले आदमीमान जे कान करेना, ईतु उ काममान केर परिणाम न लगे। नी होले परमेश्वर केर अनुग्रह, अनुग्रहए नी ठहरताक।

७होले ईकार से का? ईसाएल केर आदमीमान जेके खोजात रहाँए, उमान उके नी पालाँए। किन्तु चुनालमान के उ मिल गेलाक। जबकि बाकी सोउब कोई के कठोर बनाए देवाल गेलाक। ८शास्त्र कहेला:

“परमेश्वर उमान के एकतु चेतना मुरझाल आतमा
प्रदान करलक।” यशायाह २९:१०

“ऐसान आँईख देलाक जेकार से देखि नी सकबाँए
आउर ऐसान कान देलाक जेकार से सुईन नी
सकताँए।

आउर येहे दशा ठीक आईज तक बनाल आहे।”

व्यवस्था विवरण २९:४

a १०:१५ उद्धरण यशा. ५२:७

b १०:१६ उद्धरण यशा. ५३:१

c ११:३ उद्धरण १ राजा १९:१०, १४

d ११:४ उद्धरण १ राजा १९:१८

१दाऊद कहेला:

“अपन ही भोजन में फँईसके उमान बंदी बईन
जाओक
उमान केर पतन होक आउर उमान के दण्ड
मितोक।

१० उमान केर आँईख धुँधला होए जाओक ताकि
उमान देखेक न पारोक
आउर तोयं उमान केर पीड़ामान से, उमान
केर कमर सोभे-समय झुकाले राहोक।”

भजन संहिता ६९:२२-२३

११सेहे मोंयं कहार्थों का उमान ईकार लाई ठोकर
खालाँए कि उमान गिर के नष्ट होए जाबाँए? निश्चय नई।
लेकिन उमान केर गलती करेक से गैर यहूदी आदमीमान
के छुटकारा मिललक ताकि यहूदीमान में स्पर्धा पैदा
होक। १२ई रकाम यदि उमान केर गलती करेक केर अर्थ
सारा संसार के बड़ा लाभ आहे आउर यदि उमान केर
भटकेक से गैर यहूदीमान केर लाभ आहे होले उमान केर
सम्पूर्णता से तो बहुत कुछ होई।

१३ईके एखान मोंयं तोहरे के कहार्थों, जेमान यहूदी न
लगा, काहेकि मोंयं विशेष रूप से गैर यहूदीमान केर लाई
प्रेरित हेकों, मोंयं अपन काम केर प्रति पूरा प्रयत्नशील
आहों। १४ई आशरा से कि मोंयं अपन आदमीमान में भी
स्पर्धा जगाएक सकबों आउर उमान में से थोड़ा मान के
उद्धार करबों। १५काहेकि यदि परमेश्वर केर द्वारा उमान
के नकाईरे देवाल जाएक से जगत में परमेश्वर केर सागों
मेलपिलाप पैदा होवेला होले फिर उमान केर अपनाय
जाएक का मोरालमान में से जिलाए जाएक नी होई
जानों? १६यदि हमार भेंट केर एक भाग पवित्र आहे होले
का उ समूचाए पवित्र नैखे जानों? यदि गाछ केर सिकोड़
पवित्र आहे होले उकार डार्इरमान भी पवित्र आहे।

१७किन्तु यदि थोड़ा डार्इरमान के कईट के फेंईक
देवाल गेलाक आउर तोयं जे एकटु जंगली जोलफाई
केर डार्इर हेकिस उकार में कालाम कईर के चढ़ाए
देवाल गेलाक आउर उ जोलफाई केर अच्छा गाछ
केर सिकोड़ केर शक्ति केर हिस्सा बईन गेले, १८होले
तोयं उ डार्इरमान केर आगे, जेमान के कईट के फेंईक
देवाल गेलाक, अभिमान करेक नी लगी। आउर यदि
तोयं अभिमान करबे होले याईद रखबे ईटु तोयं न लगिस
जे सिकोड़मान के पालन पोषण कराथे, लेकिन ई तो उ
सिकोड़ हेके जे तोके पालाथे। १९एखान तोयं कहबे, “हाँ,

किन्तु डार्इरमान के ईकार लाई कटाल गेलाक कि मोर
कालाम चढ़ोक।” २०ई सच हेके, उमान अपन अविश्वास
केर कारण कईट के फेंकाल गेलाक किन्तु तोके अपन
विश्वास केर जोर में अपन जगह टिकाल आहिस। ईकार
लाई ईकार गर्व न कर लेकिन डराते रह। २१यदि परमेश्वर
प्राकृतिक डार्इरमान के नी राहेक देलाक होले उ तोके भी
नी राहेक देई।

२२ईकार लाई तोयं परमेश्वर केर कोमलता के देख
आउर उकार कठोरता में ध्यान दे। ई कठोरता उमान केर
लाई हेके जेमान गिर गेलाक किन्तु उकार करुणा तोर
लाई आहे यदि तोयं अपन में उकार अनुग्रह बनाल राहेक
देबे। नी होले गाछ से तोयं भी कईट के फेंकाल जाबे।
२३आउर यदि उमान अपन अविश्वास में नी राहबाँए होले
उमान के भी फिर गाछ से जोईड़ लेवाल जाई काहेकि
परमेश्वर समर्थी हेके कि उमान के फिर से जोड़ेक लाई।
२४जेखान तोके प्राकृतिक रूप से जंगली जोलफाई केर
गाछ से एकटु डार्इर कईट के प्रकृति केर विरुद्ध एकटु
उत्तम जोलफाई केर गाछ से जोईड़ देवाल गेलाक, होले
ई जेमान उ गाछ केर अपन डार्इर हेकाँए, अपन गाछ में
आसानी से, फिर से काहे नी जोईड़ देवाल जाई।

२५हे भाईमान! मोंयं तोहरे के ई छिपाल सच से अंजान
नी रखेक खोजार्थों, कि तोहरे अपन के बुद्धिमान समझेक
लगा कि ईसाएल केर थोड़ा आदमीमान के ऐसानेहे
कठोर बनाए देवाल जाहे आउर ऐसानेहे कठोर बईने
राहबाँए जेखान तक कि काफी गैर यहूदीमान परमेश्वर
केर परिवार केर अंग नी बईन जाबाँए। २६आउर ई रकाम
समूचा ईसाएल केर उद्धार होई। जैसान कि शास्त्र कहेला:

“उद्धार करेक वाला सिथ्योन से आवी;

उ याकूब केर परिवार से सोभे बुराईमान के दूर
करी।

२७ मोर ई प्रतिज्ञा उकार सागों

सेखान होई जेखान मोंयं उमान केर पापमान के
मिटारबों।” यशायाह ५९:२०-२१; २७:९

२८जहाँ तक सुसमाचार केर सम्बन्ध आहे, उमान तोहरे
केर हित में परमेश्वर केर शत्रु हेकाँए किन्तु जहाँ तक
परमेश्वर द्वारा उमान केर चुनाल जाएक केर सम्बन्ध आहे,
उमान उमान केर पुरखामान के देवाल वचन केर अनुसार
परमेश्वर केर प्यारा हेकाँए। २९काहेकि परमेश्वर जेके
बोलाएला आउर जेके उ देवेला, उकार दिगे से अपन
मन कभी नी बदलाएला। ३०काहेकि जैसान तोहरे मान

पहिले कभी परमेश्वर केर आज़ा नी मानात राहा किन्तु एखान तोहरे उमान केर अवज्ञाके कारण परमेश्वर केर दया प्राप्त करला। ३१वैसानेहे एखान उमान उकार आज़ा नी मानेना काहेकि परमेश्वर केर दया तोहार ऊपरे आहे। ताकि एखान उमान के भी परमेश्वर केर दया मिलोक। ३२काहेकि परमेश्वर सोउब आदमीमान केर अवज्ञा के कारागार में ईकार लाई डाईल रईखे कि उ उमान में दया करेक पारी।

परमेश्वर धन्य हेके

३३परमेश्वर केर करुणा, बुद्धि आउर ज्ञान कितना अपरम्पार आहे। उकार न्याय कितना गहरा आहे; उकार रास्ता कितना अगाम आहे। ३४शास्त्र कहेला:

“प्रभु केर मन के के जानेला?

आउर उके सलाह देवेक वाला के होवेक पारी?”

यशायाह ४०:१३

३५ “परमेश्वर के केहार का देहे?

कि केखो उकार बदली कोनो देई।”

अय्यूब ४१:११

३६काहेकि सोउब केर रचेक वाला ओहे हेके। उकरे से सोउब स्थिर आहे आउर उ उकरे लाई हेके। उकार सोभेसमय महिमा होक! आमीन।

अपन जीवन प्रभु के अर्पण करा

१२ ईकार लाई हे भाईमान परमेश्वर केर दया के स्मरण दिलाएके मोंयं तोहरे के आग्रह करार्थो कि अपन जीवन के एक जीवित बलिदान केर रूप में परमेश्वर के खुशी कईके अर्पित कई देवा। येहे तोहार आध्यात्मिक उपासना हेके जेके तोहरे के उके चुकाएक आहे। १एखान आउर आगे ई दुनिया केर रीति में न चला लेकिन अपन मन के नौतून कईके अपन के बदलाए देवा ताकि तोहरे के पता चलोकि कि परमेश्वर तोहार लाई का चाहेला। यानी जे उत्तम हेके, जे उके भाएला आउर जेटु सम्पूर्ण आहे।

३ईकार लाई उकार अनुग्रह केर कारण जे उपहार उ मोकें देहे, उके ध्यान में रईख के मोंयं तोहरे में से हर एकझन के कहाथो, अपन के यथोचित समझा अर्थात जितना विश्वास उ तोहरे के देईहे, उकारे अनुसार अपन के समझेक लगे। ४काहेकि जैसान हमार में से हर एकझन

केर शरीर में बहुत से अंग आहे। सोउब अंगमान केर काम एक जैसान नैखे ठिक ओहे रकाम। ५हमरे अनेक आहि किन्तु मसीह में हमरे एक देह केर रूप में होए जाईला। ई रकाम हर एक अंग हर दोसरे अंग से जुईड जाएला।

६होले उकार अनुग्रह केर अनुसार हमरे के जे अलग-अलग उपहार मिलहे, हमरे उसोउब के प्रयोग करबोई। यदि केखो भविष्यवाणी केर क्षमता देवाल जाहे होले उ उकार ठिन जितना विश्वास आहे उकार अनुसार भविष्यवाणी करोक। ७यदि केखो सेवा करेक केर उपहार मिलहे होले अपन के सेवा केर लाई अर्पित करोक, यदि केखो उपदेश देवेक केर काम मिलहे होले उ अपन के प्रचार केर काम में लगाएक लगे। ८यदि केहो सलाह देवेक केर होले उ सलाह देवेक लगी। यदि केखो दान देवेक केर उपहार मिलहे होले उ मुक्त भाव से दान देवेक लगे। यदि केखो अगुआई करेक केर उपहार मिलहे होले उ लगन केर साथ अगुआई करोक, जेके दया देखाएक लाई मिलहे, उ खुशी से दया करोक।

९तोहार प्रेम सच्चुसा होक। बुराई से घृणा करा। अछाई से जुड़ा। १०भाई चारे केर साथ एक दोसरे केर प्रति समर्पित रहा। आपस में एक दोसरा के आदर केर साथ अपन से अधिक महत्व देवा। ११उत्साही बना, आलसी नई, आतमा केर तेज से चमका। प्रभु केर सेवा करा। १२अपन आशा में खुशी रहा। विपत्ति में धीरज धरा। निरन्तर प्रार्थना करते रहा। १३परमेश्वर केर आदमीमान केर आवश्यकतामान में हाथ बटावा। अतिथि सम्मान केर अवसर खोजते रहा।

१४जेमान तोहरे के सताथाँए उमान के आशीर्वाद देवा। उमान के शाप न देवा, आशीर्वाद देवा। १५जेमान खुश आहाँए उमान केर सागें खुशी रहा। जेमान दुःखी आहाँए, उमान केर दुःख में दुःखी होवा। १६मेलमिलाप से रहा। अभिमान न करा लेकिन दीनमान के संगति करा। अपन के बुद्धिमान न सोचवा।

१७बुराई केर बदला बुराई से केखो न देवा। सोभे आदमीमान केर आँईख में जे अच्छा हेके उखे करेक लाई सोचा। १८जहाँ तक बईन पड़ी सोउब मनुष्यमान केर सागें शान्ति से रहा। १९केकरो से अपन से बदला न लेबा। मोर सांगमान, लेकिन ईके परमेश्वर केर क्रोध में छोईड देवा काहेकि शास्त्र में लिखाल आहे: “प्रभु कहलक बदला लेवेक मोर काम हेके। प्रतिफल मोंयं देबो।”^a

१०लेकिन तोयं होले

^a १२:१९ उद्धरण व्यवस्था ३२:३५

“यदि तोर शत्रु भूखे आहे
होले उके खाना खियाओ।
यदि उ प्यासा आहे
होले उके पीएक दे।
काहेकि यदि तोयं ऐसान करबे होले उ तोर से
शर्मिन्दा होई।” नीति. २५:२१-२२

११बुराई से न हारबा लेकिन अपन अछाई से बुराई के हराए देवा।

शासक केर आज्ञा मानबा

१३ ११र आदमी के प्रधान शासक केर अधीनता स्वीकार करेक लगे। काहेकि शासन केर अधिकार परमेश्वर केर ओर से हेके। आउर जे अधिकार मौजूद आहे उसोउब के परमेश्वर नियुक्त कईर। १३ईकार लाई जेमान शासक केर विरोध करेना, उ परमेश्वर केर आज्ञा केर विरोध करेना। आउर जेमान परमेश्वर केर आज्ञा केर विरोध करेना, उमान दण्ड पाबाँए। १३एखान देखा कोनो शासक, उ आदमी के, जे अछाई करेला, नी डरुवाएला लेकिन उखे डराएला, जे बुरा काम करेला। यदि तोयं शासक के नी डराएक खोजाथिस होले, भला काम करते रह। तोके शासक से प्रशंसा मिली।

१३जे शासक में आहे उ परमेश्वर केर सेवक हेके उ तोर भला करेक केर लाई हेके। किन्तु यदि तोयं बुरा करबे होले उके डराओ काहेकि उकार तलवार बेकार नैखे। उ परमेश्वर केर सेवक हेके जे बुरा काम करेक वालामान में परमेश्वर केर क्रोध आनेला। १३ईकार लाई समर्पण आवश्यक आहे। न केवल डर के कारण से लेकिन तोहरे केर अपन चेतना केर कारण।

१३ईकार लाई तोहरे मान कर भी चुकावाल काहेकि अधिकारी परमेश्वर केर सेवक हेके जे अपन कर्तव्य के पूरा करेक में लगल राहेला। १३जे केखो तोके देवेक आहे, उके चुकाए दे। जे कर तोके देवेक आहे, उके दे। जेकार तोर दिन से पावेक आहे, उके देई दे। जेके तोयं डराएक लगे तोयं उके डराओ। जेकार आदर करेक लगी उकार आदर कर।

प्रेम विधान हेके

१३आपसी प्रेम केर अलावा कोनो केर धार अपन ऊपरे न रख काहेकि जे अपन साथिमान से प्रेम करेला, उ ई रकाम व्यवस्था केहे पूरा करेला। १३मोंयं ईके ईकार लाई कहाथों, “व्यभिचार न करबा, हत्या न कर, चोरी न कर, लालच न

रख।”^a आउर जे भी दोसरा व्यवस्थामान होए सकेला, ई वचन में उसोभे आहे, “तोयं अपन साथी के ऐसाने प्यार करेक लगी, जैसान तोयं अपन के करिसिला।”^b १३प्रेम अपन साथी केर बुरा कभी नी करेला। ईकार लाई प्रेम कईरके व्यवस्था केर विधान के पूरा करेक आहे।

१३ई सोउब के तोहरे ईकार लाई करा कि जैसान समय में तोहरे रथाथा, उके जानाला। तोहरे जानाला कि तोहार लाई अपन नींद से जागेक केर समय आए पहुँईचे, काहेकि जेखान हमरे विश्वास धारण कईर राही हमार उद्धार एखान उकार से अधिक निकट आहे। १३“राईत” लगभग पूरा होए चुईके, “दिन” सामनेहे आहे, ईकार लाई आवा हमरे उ काममान से छुटकारा होए जाबोई जे अँधकार केर हेके। आवा हमरे इंजोत केर हाथेयारमान के धारण करबोई। १३ईकार लाई हमरे वैसानेहे उत्तम रीति से रहबोई जैसान दिन केर समय रहीला। बहुत अधिक निमन्त्रण में जाएके खाए पीके धुत्त न होए जावा। लुच्चापन दुराचार व्यभिचार में नी गिरबोई। न झगडां आउर न ही हिंसा करबोई। १३लेकिन प्रभु यीशु मसीह के धारण करबोई। आउर अपन मानव देह केर ईच्छामान के पूरा करेक में न लईग रहा।

दोसरामान में दोष न निकलावा

१४ १३जेकार विश्वास दुर्बल आहे, उकार भी स्वागत करा किन्तु मतभेद में झगडा करेक केर लाई नई। १३केहो सोचेना कि उ सोउब कुछ खाएक सकेला कईके, किन्तु कोनो दुर्बल आदमी बस सागपाता हे खाएला। १३होले उझन जे हर रकाम केर खाना खाएला, उ उझन आदमी के हीन नी समझेक लगी जे कुछ वस्तुमान के नी खाएला। वैसानेहे उ जे कुछ वस्तुमान के नी खाएला, उ सोउब कुछ खाएक वालाझन के बुरा नी कहेक लगे। काहेकि परमेश्वर उके अपनाए लेहे। १३तोयं केहो दोसरा घर केर दास में दोष लगाएक वाला के हेकिस? उकार अनुमोदन या उके अनुचित ठहराएक मालिक में निर्भर करेला। उ स्थिर रही काहेकि उके प्रभु स्थिर होएके टिक रहेक केर शक्ति देहे।

१३आउर फिर केहो कोनो एक दिन के सोउब दिनमान से श्रेष्ठ मानेला आउर दोसरा दिनके उ सोउब दिन के बराबर मानेला होले हर एकझन के भाल से अपन बुद्धि केर बात मानेक लगे। १३जे केहो विशेष दिन के मनेना उ उके प्रभु के आदर देवेक केर लाई मनेला। आउर जे सोउब कुछ

^a १३:९ उद्धारण निर्गमन २०:१३-१५, १७

^b १३:९ उद्धारण लैव्य १९:१८

खाएला उ भी प्रभु के आदर देवेक केर लाई खाएला। काहेकि उ परमेश्वर के धन्यवाद करेला। आउर जे कोनो वस्तुमान के नी खाएला, उ भी ऐसन ईकरे लाई करेला काहेकि उ भी प्रभु के आदर देवेक खोजेला। उ भी परमेश्वर केहे धन्यवाद देवेला।

७हमार में से केहो भी न तो अपन लाई जीएना, आउर न अपन लाई मोराथाँए। ८हमरे जीयाथी होले प्रभु केर लाई आउर यदि मोराथी होले भी प्रभु केर लाई। सेहेसे चाहे हमरे जिबोई चाहे मोरबोई हमरे होले प्रभु केर हेकि। ९ईकरे लाई मसीह मोरलक; आउर ईकारे लाई जी उठलक ताकि उ, उ जेमान मोईर चुईकाँए आउर उजेमान एखान जीवित आहाँए, दुनों केर प्रभु होए सकी।

१०सेहेसे तोय्रं अपन विश्वास में आपन भाई में दोष काहे लगाथिस? या तोय्रं अपन विश्वास में निर्बल भाई के हीन काहे मानिसिला? हमरे सोभे कोई के परमेश्वर केर न्याय केर सिंहासन केर आगे खड़ा होवेक आहे। ११शास्त्र में लिखाल आहे:

“प्रभु कहलक, ‘मोर जीवन केर शपथ’
‘हर कोई के मोर सामने घुटना टेकेक होई;
आउर हर जुबान से परमेश्वर के चिन्ह
पाबाँए।”

यशायाह ४५:२३

१२सेहेसे हमार में से हर एकजन के परमेश्वर केर आगे अपन लेखा-जोखा देवेक होई।

पाप केर लाई न उकसाव

१३सेहेसे हमरे आपस में दोष लगाएक बंद करबोई आउर ई निश्चय करबोई कि अपन भाई केर रास्ता में हमरे कोनो अड़चन खड़ा नी करबोई आउर न उके पाप केर लाई उकसाबोई। १४प्रभु यीशु में आस्थावान होवेक केर कारण मोंय्रं मानेना कि अपन आप में कोनो भोजन अपवित्र नैखे। उ केवल उकार लाई अपवित्र हेके, जे उके अपवित्र मानेला, उकार लाई उके खाएक अनुचित हेके।

१५यदि तोर भाई के तोर खाना से ठेस पहुँचाये होले तोय्रं आसल में प्यार केर व्यवहार नी कराथिस। होले तोय्रं अपन खाना से उके ठेस न पहुँचाओ काहेकि मसीह उकार लाई भी अपन प्राण देहे। १६सेहेसे जे तोर लाई अच्छा आहे उके निन्दा केर करण बनेक न दे। १७काहेकि परमेश्वर केर राज्य बस खाएक-पीएक न लगे लेकिन उ तो धार्मिकता हेके, शांति हेके आउर पवित्र आतमा से प्राप्त आनन्द हेके। १८जे मसीह केर ई रकाम सेवा करेला,

उकार से परमेश्वर खुश राहेला आउर आदमीमान उके सम्मान देवेना।

१९ईकार लाई, उ बातमान में लगेक लगे जे शांति के बढ़ाएला आउर जेकार से एक दोसरे के आत्मिक बढ़ोतरी में सहायता मिलेला। २०खाना केर लाई परमेश्वर केर काम के न बिगाड़ावा। हर रकाम केर भोजन पवित्र आहे किन्तु कोनो भी आदमी केर लाई उ कोनो भी खाएक ठीक न लगे जे केखो आउर भाई के पाप केर रास्ता में लेई जाई। २१माँस नी खाएक श्रेष्ठ हेके, शराब नी पीएक अच्छा हेके आउर कोनो भी ऐसान नी करेक उत्तम हेके जे तोर भाई के पाप में ढेकाईल लेगेला।

२२अपन विश्वास के परमेश्वर आउर अपन बीच में रख। उ धन्य हेके जे जेके उत्तम समझेला, उकार लाई अपन के दोषी नी पाएला। २३किन्तु यदि कोनो ऐसान वस्तु के खाएला, जेके खाएक केर प्रति उ आश्वस्त नैखे होले उ दोषी ठहरेला। काहेकि उकार खाएक उकार विश्वास केर अनुसार नैखे आउर उ सोउब कुछ जे विश्वास में टिकाल नैखे, पाप हेके।

१५ हमरे जेमान आत्मिक रूप से शक्तिशाली आहि, हमरे के उमान केर दुर्बलता सहेक लगी जेमान शक्तिशाली नैखाँए। हमरे बस अपन आपन के खुश नी करेक लगे। २हमार में से हर एकजन, दोसरामान केर अच्छाई केर लाई ई भावना केर साथ कि उमान केर आत्मिक बढ़ोतरी होक, उमान के खुश करेक लगे। ३हियाँ तक कि मसीह भी स्वयं के खुश नी कईर राहे। लेकिन जैसान कि मसीह केर बारे में शास्त्र कहेला: “उमान केर अपमान जेमान तोर अपमान करलाँए, मोर ऊपरे आए पड़लक।” ४हर उ बात जे शास्त्रमान में पहिले लिखाल जाहे, हमरे के शिक्षा देवेक केर लाई राहे ताकि जे धीरज आउर बढ़ावा शास्त्रमान से मिलेला, हमरे उकार से आशरा प्राप्त करबोई। ५आउर समूचा धीरज आउर बढ़ावा केर स्रोत परमेश्वर तोहरेके वरदान देओक कि तोहरे मान एक दोसरा केर सागें यीशु मसीह केर उदाहरण में चईलके आपस में मिल जुईल के रहा।

६ताकि तोहरे सोउब कोई एके सागें एके स्वरु से हमार प्रभु यीशु मसीह केर परमआब्बा, परमेश्वर के महिमा प्रदान करा। ७ईकार लाई एक दोसरे के अपनावा जैसान तोहरे के मसीह अपनालक। ईके परमेश्वर केर महिमा केर लाई करा। ८मोंय्रं तोहरे मान के बताथों कि ई प्रकट करेक केर लाई कि परमेश्वर विश्वसनीय हेके उमान केर पुरखामान के देवाल परमेश्वर केर वचन के दृढ़ करेक

लाई मसीह यहूदीमान केर सेवक बनलक। १ताकि गैर यहूदीमान भी परमेश्वर के उकार करुणा केर लाई महिमा प्रदान करी। शास्त्र कहाथे:

“ईकार लाई गैर यहूदीमान केर बीच
तोके चिन्हबों आउर तोर नाम केर महिमा
गाबों।” *भजन सहिता १८:४९*

१०आउर ईके भी कहाल जाहे,

“हे गैर यहूदीमान, परमेश्वर केर चुनाल आदमीमान
केर सागों खुश रहा।” *व्यवस्था विवरण ३२:४३*

११आउर फिर शास्त्र ईके भी कहाथे,

“हे गैर यहूदी मान, तोहरे प्रभु केर स्तुति करा।
आउर सोभे जातिमान, परमेश्वर केर स्तुति
करा।” *भजन सहिता ११७:१*

१२आउर फिर यशायाह भी कहाथे,

“यिंशै केर एक वंश प्रकट होई
जे गैर यहूदीमान केर शासक केर रूप में उभरी।
गैर यहूदीमान उकार ऊपरे अपन आशा
करबाँए।” *यशायाह ११:१०*

१३सोभे आशरा केर स्रोत परमेश्वर, तोहरे के सम्पूर्ण
आनन्द आउर शांति से भईर देओक जैसान कि उकार
में तोहरे केर विश्वास आहे। ताकि पवित्र आतमा केर
शक्ति से तोहरे आशरा से भरपूर होए जावा।

पौलुस द्वारा अपन चिट्ठी आउर काममान केर चर्चा

१४हे मोर भाईमान, मोर स्वयं तोहार ऊपरे भरोसा
आहे कि तोहरे अछाई से भराल आहा आउर ज्ञान से
परिपूर्ण आहा। तोहरे एक दोसरे के शिक्षा देई सकाला।
१५किन्तु तोहरे के फिर से याईद दिलाएक केर लाई मोंयं
थोड़ा विषयमान केर बारे में साफा साफा लिखलों।
मोके परमेश्वर केर जे अनुग्रह मिल्ले, उकार कारण से
ईके कइर। १६यानी मोंयं गैर यहूदीमान केर लाई यीशु
मसीह केर सेवक बईन के परमेश्वर केर सुसमाचार केर
लाई एकज्जन याजक केर रूप में काम करबों ताकि गैर

यहूदीमान परमेश्वर केर आगे स्वीकार करेक योग्य भेंट
बईन सकी आउर पवित्र आतमा केर द्वारा परमेश्वर केर
लाई एकदम पवित्र बनबों।

१७सेहेसे मसीह यीशु में एकज्जन आदमी केर रूप
में परमेश्वर केर प्रति अपन सेवा केर मोके गर्व आहे।
१८काहेकि मोंयं बस ओहे बातमान के कहेक केर साहस
करोना जेसोउब के मसीह गैर यहूदीमान के परमेश्वर
केर आज्ञा मानेक केर रास्ता देखाएक केर काम मोरे
कथामान, मोर काममान, १९आश्चर्य चिन्हामान आउर
अद्भुत काममान केर शक्ति आउर परमेश्वर केर आतमा
केर सामर्थ्य से, मोर द्वारा पूरा करलक। सेहे यरूशलेम से
लेईके ईल्लुरिकुम केर चाईरों ओर मसीह केर सुसमाचार
केर उपदेश केर काम मोंयं पूरा करलों। २०मोर मन
में सोभसमय येहे अभिलाषा रहे कि मोंयं सुसमाचार
केर उपदेश हुवाँ देबों जहाँ केहो मसीह केर नाम तक
नी जानेना, ताकि मोंयं कोनो दोसरा आदमी केर नीव में
निर्माण नी करबों। २१किन्तु शास्त्र कहाथे:

“जेमान के उकार बारे में नी बताल जाहे, उमान उके
देखबाँए।
आउर जेमान सुनबे नी घईराँए, उमान
समझबाँए।” *यशायाह ५२:१५*

पौलुस केर रोम जाएक केर योजना

२२मोर ई कर्तव्य मोके तोहार टिन आवेक से बार बार
रोकते राहे।

२३किन्तु एखान ई प्रदेशमान में कोनो स्थान नी बईचे
आउर बहुत साल से मोंयं तोहरे से मिलेक खोजात राहों,
२४सेहेसे मोंयं जेखान ईसपानिया जाबों होले आशरा
कराथों तोहरे के मिलबों! मोर उम्मीद आहे कि ईसपानिया
जाएक समय तोहरे से भेंट होई। तोहरे सागों थोड़ा दिन
ठहरेक केर आनन्द लेवेक केर पिछे मोर आशरा आहे
कि हुवाँ केर यात्रा केर लाई मोके तोहरे केर मदद मिली।

२५किन्तु एखान मोंयं परमेश्वर केर पवित्र आदमीमान
केर सेवा में यरूशलेम जाथों। २६काहेकि मकिदुनिया
आउर अखैया केर कलीसिया केर आदमीमान
यरूशलेम में परमेश्वर केर पवित्र आदमीमान में जेमान
दरिद्र आहाँए, उमान केर लाई कोनो देवेक केर निश्चय
कईराँए। २७हाँ, उमान केर प्रति उमान केर कर्तव्य
भी बनेला काहेकि यदि गैर यहूदीमान, यहूदीमान
केर आध्यात्मिक काम में हिस्सा बटाहाँए होले गैर
यहूदीमान के भी उमान केर लाई भौतिक सुख जुटाएक

लगी। १८सेहेसे अपन ई काम पूरा कईके आउर ईकट्टा कराल ई धन के सुरक्षा केर सागें उमान केर हाथ में सौँईप के मोंयं तोहरे केर नगर से होएके ईसपानिया केर लाई रवाना होबों १९आउर मोंयं जानोना कि जेखान मोंयं तोहार ठिन आबों होले तोहार लाई मसीह केर पूरा आशीवादान केर समेत आबों।

२०हे भाईमान, तोहर से मोंयं प्रभु यीशु मसीह केर ओर से आतमा से जे प्रेम पाएना, उकार साक्षी देई के प्रार्थना करायों कि तोहरे मोर ओर से परमेश्वर केर प्रति सच्चा प्रार्थनामान में मोर साथ देवा ३१कि मोंयं यहूदीमान में अविश्वासिमान से बईच रहबों आउर यरूशलेम केर प्रति मोर सेवा के परमेश्वर केर पवित्र आदमीमान स्वीकार करबाँए। ३२ताकि परमेश्वर केर ईच्छा केर अनुसार मोंयं खुशी केर साथ तोहार ठिन आएके तोहार सागें आनन्द मनाएक पारबों। ३३सम्पूर्ण शांति केर धाम परमेश्वर तोहरे केर सागें रहोक। आमीन।

रोम केर मसीहिमान के पौलूस केर संदेश

१६

मोंयं किखिया केर कलीसिया केर विशेष सेविका हमार बहिन फ्रीबे के तोहरे से सिफारिश करायों १कि तोहरे उके प्रभु में ऐसान रीति से ग्रहण करा जैसान रीति परमेश्वर केर आदमीमान केर योग्य हेके। उके तोहरे से जे कुछ अपेक्षित होए सोउब कुछ से तोहरे उकार मदद करबा काहेकि उ मोर समेत बहुतमान केर सहायक राहे।

३ प्रिस्का आउर अक्विला के मोर नमस्कार। उमान

यीशु मसीह में मोर सहकर्मी हेकाँए। ४उमान मोर प्राण बचाएक केर लाई अपन जीवन के भी दावें में लगाए देई रहाँए। न केवल मोंयं उमान केर धन्यवाद करायों लेकिन गैर यहूदीमान केर सोभे कलीसिया भी उमान केर धन्यवादी हेकाँए।

५ उ कलीसिया के भी मोर नमस्कार जेमान उमान केर घर में जमा होवेना।

मोर प्रिय सर्गी ईपनितुस के मोर नमस्कार जे एशिया में मसीह के अपनाएक वालामान में पहिला हेके।

६ मरियम के, जेहार तोहार लाई बहुत काम करलक नमस्कार।

७ मोर कुटुम्बी अन्द्रनीकुस आउर यूनियास के, जे मोर सागें कारागर में रहाँए आउर जे प्रमुख

धर्म-प्रचारकमान में प्रसिद्ध आहाँए, आउर जेमान मोर से भी पहिले मसीह में रहाँए, मोर नमस्कार।

८ प्रभु में मोर प्रिय सर्गी अम्पलियातुस के नमस्कार।

१मसीह में हमार सहकर्मी उरबानुस तथा मोर प्रिय सर्गी ईस्तुखुस के नमस्कार। १०मसीह में खरा आउर सच्चा अपिल्लेस के नमस्कार। अरिस्तुबुलुस केर परिवार के नमस्कार। ११यहूदी साथी हिरोदियोन के नमस्कार।

नरकिस्सुस केर परिवार केर उ आदमीमान के नमस्कार जेमान प्रभु में आहाँए। १२त्रुफेना आउर त्रुफोसा के जेमान प्रभु में परिश्रमी कार्यकर्ता हेकाँए, नमस्कार।

मोर प्रिया परसिस के, जेहार प्रभु में कठिन परिश्रम कई, मोर नमस्कार।

१३ प्रभु केर असाधारण सेवक रूफुस के आउर उकार आयो के, जे मोर भी आयो हेके, नमस्कार।

१४ असुक्रितुस, फिलगोन, हिर्मैस, पत्रुबास, हिर्मोस आउर उमान केर साथी बंधुमान के नमस्कार।

१५ फिल्लुगुस, यूलिया, नेर्युस तथा उकार बहिन उलुम्पास आउर उमान केर सोभे साथी संतमान के नमस्कार।

१६ तोहरे मान पवित्र चुंबन द्वारा एक दोसरा केर स्वागत करा।

तोहरे सोभे मसीही कलीसिमान केर ओर से नमस्कार।

१७हे भाईमान, मोंयं तोहरे से प्रार्थना करायों कि तोहरे जेसोउब शिक्षा पाएहा, उकार विपरीत तोहरे में जेमान फूट डालेना आउर दोसरामान केर विश्वास के बिगाड़ाएना, उमान से सावधान रहा, आउर उमान से दूर रहबा। १८काहेकि ई आदमीमान हमार प्रभु यीशु मसीह के नई लेकिन अपन पेट केर उपासना करेना। आउर अपन खुशामद भराल चिकनी चुपड़ी बातमान से सिधा-सधा आदमीमान केर हृदय के छलेना। १९तोहरे केर आज्ञाकारिता केर चर्चा बाहिरे हर जगह तक पहुँईच चुईके। ईकार लाई तोहरे से मोंयं बहुत खुश आहों। किन्तु मोंयं खोजोना कि तोहरे भलाई केर लाई बुद्धिमान बईन रहा आउर बुवाई केर लाई अबोध रहा।

२०शांति केर स्रोत परमेश्वर शीघ्र हे शैतान के तोहरे केर गोदु निचे कुचईल देई।

हमार प्रभु यीशु मसीह केर तोहरे में अनुग्रह होक।

२१हमार साथी कार्यकर्ता तीमुथियुस आउर मोर यहूदी साथी लूकियुस, यासोन तथा सोसिपत्रुस केर ओर से तोहरे के नमस्कार।

२२ई चिट्ठी केर लिखोईया मोयं तिरतियुस केर प्रभु में तोहरे के नमस्कार।

२३मोर आउर समूचा कलीसिया केर आतिथि सन्मान करोईया ग्युस केर तोहरे के नमस्कार। ईरास्तुस जे नगर केर खजांची हेके आउर हमार बन्धु क्वारतुस केर तोहरे के नमस्कार। २४^a

२५उकार महिमा होक जे तोहरे केर विश्वास केर

अनुसार यानी यीशु मसीह केर सन्देश के जे सुसमाचार केर मोंयं उपदेश देओना उकार अनुसार तोहरे के सुदृढ़ बनाएक में समर्थी आहे। परमेश्वर केर ई रहस्यपूर्ण सच युगयुगान्तर से छिपाल जाए राहे। २६किन्तु जेके अनन्त परमेश्वर केर आदेश से भविष्यवक्तामान केर लिखाल द्वारा एखान हमरे आउर गैर यहूदिमान में प्रकट कईरके बताए देवाल गेलाक जेकार से विश्वास से पैदा होवेक वाला आज्ञाकारिता पैदा होक। २७यीशु मसीह द्वारा उ एक मात्र ज्ञानमय परमेश्वर केर अनन्त काल तक महिमा होक। आमीन!

^a १६:२४ कोनो यूनानी प्रतिमान में पद २४ जोड़ाल जाहे: “हमार प्रभु यीशु मसीह केर अनुग्रह तोहरे सोउबकर सागें रहोक। आमीन।”